

關里文獻考

闕里文獻考卷十四

祀典第三之一

文王世子曰凡始立學者必釋奠於先聖先師又曰凡學春官釋奠於其先師秋冬亦如之又曰始立學者既興器用幣然後釋菜王制曰出征執有罪反釋奠于學以訊馘告學記曰大學始教皮弁祭菜示敬道也周官大司樂凡有道有德者使教焉死則以爲樂祖祭於瞽宗大胥春入學舍菜合舞秋頒學合聲歷稽古禮凡釋奠之事有六釋菜之事有三雖制有輕重詳略之異而學必有祭以祀其始爲設教之人而不忘所自其義一也周室衰微禮樂崩壞延及暴秦益滅棄先王之法漢興未暇復古至成帝時始詔立辟雍於國南而其緒未竟光武中興乃大營太學車駕親自臨幸彬彬乎稱盛舉矣然其時所祭之先聖先師史缺有聞而孔子之祀尙未出於闕里明帝永平閒益修明養老習射之禮令郡縣道學校皆祀聖師周公孔子

於是孔子始祀於庠序焉第或聖或師升降不一迄於唐初尙無定論貞觀中慨然釐正祀典專以孔子爲先聖然尙循康成禮有高堂生樂有制氏之說乃取左穀以下二十二人專門訓詁之儒爲先師而傳道受業高弟子自顏子外皆不得與於配食之列猶不無可議者嗣自兩宋元明代有更革而尊崇之盛極於

國朝類而紀之亦考鏡得失之林也按周敬王四十二年魯哀公誄孔子稱曰哀哉尼父鄭康成謂尼父者因其字以爲諡也後世遂以爲諡孔子之始考禮有誄而諡者如貞惠文子是也有誄而不諡者如縣賁父是也諡必兼誄而誄不必諡故吳草廬曰誄者述其功行以哀之之詞如後世祭文之類非諡也况諡法無尼字康成之說恐未足爲據漢高帝十二年冬十一月自淮南過魯以太牢祭孔子此後世帝王祀孔子之始元帝時詔褒成侯霸以所食邑祀孔子此世爵奉祠之始平帝元始元年夏六月追諡孔子爲褒成宣尼公蓋孔

子之有謚實始於此東漢明帝永平二年冬十月養三老五更於辟雍令郡縣道行鄉飲酒禮於學校皆祀周公孔子牲以大此國學郡縣祀孔子之始十五年帝東巡過魯祀仲尼及七十二弟子此弟子從祀之始桓帝元嘉三年春三月魯相乙瑛請爲孔子廟置百石卒史一人典主守廟春秋享禮出王家錢給大酒直制曰可靈帝建寧二年春三月魯相史晨請依社稷出王家穀春秋行禮以供禋祀詔從之光和元年立鴻都門學畫孔子及七十二弟子像魏明帝景初閒魯相上言宗聖侯未有命祀之禮宜給牲牢長吏奉祀尊爲貴神制下三府議司空崔林議曰宗聖侯亦以王命祀不爲未有命也孔子以大夫之後特受無疆之祀可謂崇明報德矣無復重祀於非族也齊王芳正始二年春二月帝講論語通五年夏五月講尙書通七年冬十二月講禮記通並使太常釋奠以太牢祭孔子於辟雍以顏淵配此國學釋奠以弟子配享之始晉宋以後釋奠皆採正始故事

以顏淵配焉晉武帝泰始三年冬十一月詔大學及魯國四時備三牲祀孔子七年皇太子講孝經通親以太牢祀孔子此太子釋奠之始自是皇太子每通一經必親釋奠於大學而歷朝亦並舉其禮東晉時孔子裔孫襲封奉聖亭侯於江左明帝泰寧三年詔給奉聖亭侯亭四時祠祭直如泰始故事宋文帝元嘉十九年冬十二月丙申詔曰胄子始集學業方興自微言泯絕逝將千祀感事思人意有慨然奉聖之蔭可速議繼襲於先廟地特爲營造依舊給祠直令四時饗祀二十二年皇太子釋奠於大學樂用登歌此釋奠用樂之始孝武帝孝建元年冬十月戊寅詔曰仲尼體天降德維周興漢經緯三極冠冕百王爰自前代咸加褒述典司失人用缺宗祀先朝遠存遺範有詔繕立世故妨道事未克就國難頻深忠勇奮勵實憑聖義大教所敦永惟兼懷無忘待旦可開建廟制同諸侯之禮詳擇爽塏厚給祭秩南齊武帝永明三年秋詔集有司議釋奠釋菜當行何禮用

何樂及禮器尙書令王儉議曰中朝以來釋菜禮廢今之所行釋奠而已金石俎豆皆無明文方之七廟則輕比之五祀則重陸納車蔭謂宣尼廟宜依亭侯之爵范甯欲依周公之廟用王者儀范宣謂當其爲師則不臣之釋奠曰備帝王禮樂此則車陸失於過輕二范傷於太重皇朝屈尊弘教待以師資引同上公卽事惟允元嘉立學裴松之議應舞六佾以郊樂未具故權奏登歌今金石已備宜設軒縣之樂六佾之舞牲牢器用悉依上公詔從之此釋奠用舞之始七年春二月己丑詔曰宣尼誕敷文德峻極自天發揮七代陶鈞萬品英風獨舉素王誰匹功隱於當年道深於日月感麟朕世緬邈千祀川竭谷虛邱夷淵塞非但洙泗湮淪至乃饗堂之主前王敬仰崇修寢廟歲月亟流鞠爲茂草今學校興立實稟洪規撫事懷人彌增欽屬可改築宗祊務在爽塏量給祭秩禮同諸侯奉聖之爵以時紹繼明帝永泰元年春三月戊申詔曰仲尼明聖在躬允光上哲宏厥雅道

大訓生民師範百王軌儀千載世人斯仰忠孝攸出元功潛被至德
彌闡雖反袂遐曠而祧薦靡缺時祭舊品秩比諸侯頃歲以來祀典
陵替俎豆寂寥牲牢莫舉豈所以克昭盛烈永隆風教者哉可式循
舊典詳復祭秩使牢餼備禮欽饗兼申梁武帝天監四年夏六月庚
戌詔建孔子廟八年秋九月皇太子親釋奠周捨以爲先師在堂義
所當敬皇太子宜登阼階以明從師之義從之敬帝太平二年春正
月壬寅詔曰夫子降靈體赫經仁緯義允光素王載闡元功仰之者
彌高誨之者不倦立忠立孝德被蒸民制禮作樂道冠羣后雖泰山
頽峻一簣不遺而泗水餘瀾千載猶在自皇圖屯阻祧薦不修奉聖
之門似續殲滅敬神之寢簋簠寂寥永言聲烈實兼欽愴可搜舉魯
國之族以爲奉聖侯并繕廟堂供備祀典四時薦秩一皆遵舊陳後
主至德三年冬十一月己未詔曰宣尼誕膺上哲體資至聖祖述憲
章之典並天地而合德樂正雅頌之奧與日月而偕明垂後昆之訓

範開生民之耳目梁季湮微靈寢亡處鞠爲茂草三十餘年敬仰如在永惟愴息今雅道雍熙由庚得所斷琴故履零落不追閱篋開書無因循復可詳之禮典改築舊廟蕙房桂棟咸使維新芳馨潔滌以時饗奠拓跋魏道武帝天興四年春二月丁亥命樂師入學習舞釋菜於先聖先師太武帝始光三年春二月詔起太學於城東祀孔子以顏淵配初晉宋之際五胡雲擾闕里祀典久廢不修後魯郡折入北朝孝文帝延興二年春二月乙巳詔曰尼父稟達聖之資體生知量窮理盡性道光四海頃者徐淮未賓廟隔非所致令祠典頓寢禮章殄滅遂使女巫妖覲淫進非禮殺生鼓舞倡優媒狎豈所以尊明師敬聖道者也自今以後有祭孔子廟制用酒脯而已不聽婦女合雜以祈非望之福犯者以違制論其公家有事自如常禮犧牲粢盛務盡豐潔臨事致敬令肅如也牧司之官明糾不法使禁令必行太和十三年秋七月詔立孔子廟於京師十六年春二月癸丑詔改

諡宣尼曰文聖尼父帝臨宣文堂引儀曹尙書劉昶鴻臚卿游明根
行儀曹事李韶授策詣廟告諡北齊之制將講於天子先定經於孔
廟講畢以一太牢釋奠尼父配以顏回列軒縣樂六佾舞行三獻禮
皇太子每通一經及新立學必釋奠每歲春秋二仲常行其禮每月
旦祭酒領博士以下及諸生拜孔揖顏郡學則於坊內立孔顏廟博
士以下亦每月朝按此爲後世春秋釋奠及朔日行禮之始北周武
帝天和元年秋七月詔釋奠者學成之祭自今胄子入學不勞釋奠
宣帝大象二年春三月丁亥詔曰盛德之後是稱不絕功施於民義
昭祀典孔子德惟藏往道實生知以大聖之才屬千古之運載弘儒
業式敘彝倫至如參贊天人之理裁成禮樂之務故以作範百王垂
風萬葉朕欽承寶歷服膺教義眷言洙泗懷道滋深而褒成啓號雖
彰故實旌崇聖績猶有闕如可追封爲鄒國公邑數準舊并立後承
襲別於京師置廟以時祭享隋制國子寺每歲以四仲月上丁釋奠

先聖先師州郡學則以春秋仲月釋奠唐高祖武德二年夏六月戊戌詔曰盛德必祀義存方冊達人命世流慶後昆爰始姬旦匡翊周邦創設禮經大明典憲啓生民之耳目窮法度之本源粵若宣尼天姿睿哲四科之教歷代不刊三千之徒風流無斁惟茲二聖道濟生民尊禮不修孰明褒尚宜命有司立周公孔子廟各一所四時致祭仍博求其後具以名聞詳考所宜當加爵土七年詔以周公爲先聖孔子配享太宗貞觀二年左僕射房元齡博士朱子奢建言周公尼父俱稱聖人庠序釋奠本緣夫子故晉宋梁陳及隋大業以前皆以孔子爲先聖顏回爲先師歷代所行古今通允伏請停祭周公升孔子爲先聖配以顏回詔從之四年詔州縣學皆作孔子廟十一年秋七月尊孔子爲宣父二十一年詔以左邱明卜子夏公羊高穀梁赤伏勝高堂生戴聖毛萇孔安國劉向鄭眾賈逵杜子春馬融盧植鄭康成服虔何休王肅王弼杜預范甯二十二入代用其書垂於國中

自今有事於太學可並配饗宣父廟堂此先儒配孔子之始初國學
釋奠以儒官爲祭主直書博士姓名至是中書侍郎許敬宗等奏按
禮學官釋奠於其先師鄭氏謂詩書禮樂之官也四時之學將習其
道故儒官釋奠各於其師旣非國家行禮所以不及先聖至於春秋
合樂則天子視學命有司與秩節總祭先聖先師焉秦漢釋奠無文
魏則使太常行事自晉宋以降時有親行而學官爲主全無故實且
名稱國學樂用軒縣樽俎威儀並皆官備在於臣下理不合專况凡
在小神猶皆遣使行禮釋奠旣準中祀據理必須稟命令請國學釋
奠令國子祭酒爲初獻祝詞稱皇帝謹遣仍令司業爲亞獻博士爲
終獻其諸州刺史爲初獻上佐爲亞獻博士爲終獻縣學令爲初獻
丞爲亞獻博士旣無秩請主簿若尉爲終獻州縣釋奠旣請遣刺史
縣令親爲祭主望請準祭祀給明衣國學祭以太牢樂用軒縣六佾
之舞並登歌一部與大祭祀遇改用中丁州縣常用上丁無樂祭以

少牢詔從之此後世國學遣官釋奠之始而直省以長官主祭亦始於此會皇太子釋奠自爲初獻遂以祭酒司業爲亞終獻高宗永徽中復以周公爲先聖孔子爲先師顏回左邱明以下皆從祀顯慶二年太尉長孫無忌等言謹按禮記云凡學春官釋奠於其先師鄭康成注曰官謂詩書禮樂之官先師者若禮有高堂生樂有制氏詩有毛公書有伏生可以爲師者又禮記曰始立學釋奠於先聖鄭康成注曰若周公孔子也據禮爲定昭然自別聖則非周卽孔師則偏善一經漢魏以來取捨各異顏回夫子互作先師宣父周公迭爲先聖求其節文遞有得失所以貞觀之末親降綸言依禮記之明文酌康成之奧說正夫子爲先聖加眾儒爲先師永垂制於後昆革往代之紕繆而今新令不詳制旨輒事刊改遂違明詔但成王幼年周公踐極制禮作樂功比帝王所以禹湯文武成王周公爲六君子又說明王孝道乃還周公嚴配此卽姬旦鴻業合同王者祀之儒宮就享實

貶其功仲尼生衰周之末拯文喪之弊祖述堯舜憲章文武弘聖教
於六經闡儒風於千古故孟軻稱生民以來一人而已胡可降茲上
哲俯入先師且邱明之徒見行其學貶爲從祀亦無故事今請改令
從詔於義爲允其周公仍依別禮配享武王詔從之乾封元年春正
月辛卯詔曰朕聞德契機神盛烈光於後代化成天地元功被於庶
物魯大司寇宣尼父孔子先聖資大聖之材屬衰周之末思欲屈己濟
俗弘道佐時應聘周流莫能見用想乘桴以咏歎因獲麟而興感於
是垂素王之雅則正魯史之繁文播鴻業於一時昭景化於千祀朕
嗣膺寶歷祇奉睿圖憲章前王規矩先聖崇至公於海內行大道於
天下遂得八表乂安兩儀交泰功成化洽禮盛樂和展采東巡迴輿
西土途經茲境撫事興懷駐蹕荒區願爲師友瞻望幽墓思承格言
雖燕寢荒蕪餘基尙在靈廟虛寂徽烈猶存孟軻曰自生民以來未
有若孔子者也微禹之歎旣深褒崇之道宜峻可追贈太師庶年代

雖遠式範令圖景業維新儀型茂實其廟宇制度卑陋宜更加修造
仍令三品一人以少牢致祭褒聖侯德倫既承蔭緒有異常流其子
孫並宜免賦役總章元年夏四月乙卯詔曰皇太子弘近因釋菜齒
胄上庠祇事先師馳心近侍仰崇山而景行眷曩哲以勤懷顯顏曾
之特高揚仁義之雙美請申褒贈載甄芳烈朕嘉其進德冀以思齊
訓誘之方莫斯爲尙顏回可贈太子少師曾參可贈太子少保並配
享成亨元年夏五月詔曰諸州縣孔子廟堂有破壞並先來未造者
遂使先師缺奠祭之儀久致飄零深非敬本宜令有司速事營造中
宗嗣聖七年冬十月封孔子爲隆道公神龍元年詔以鄒魯百戶爲
隆道公采邑收其租稅用供薦享睿宗太極元年春二月丁巳皇太
子釋奠帝親褰孔子贊加贈顏回太子太師曾參太子太保元宗開
元七年冬十一月乙亥皇太子入學齒胄謁先聖初詔以宋璟爲亞
獻蘇頌爲終獻臨享帝思齒胄義乃詔三獻皆用胄子祀先聖如釋

真八年國子司業李元瓘奏言先聖廟以顏子配則配像當坐今乃立侍準禮授坐不立授立不跪况顏子道亞生知才光入室旣當配享合從坐侍又四科弟子閔子騫等並服膺儒術親承聖教雖復列像廟堂不參享祀謹按祠令何休等二十二賢猶霑從祀豈有升堂入室之子獨不霑春秋配享之餘請春秋釋奠列在二十二賢之上七十子者則文翁之壁尙不缺如豈有國庠遂無圖繪請命有司圖形於壁兼爲立贊庶敦勸儒風光崇聖烈曾參孝道可崇獨受經於夫子望準二十二賢從享詔從之乃以十哲爲坐像悉與祀曾參特爲之像坐亞之圖七十子及二十一賢於廟壁帝以顏子亞聖親爲製贊書於石仍令當朝文士分爲之贊題其壁焉此十哲配祀之始十一年詔春秋二時釋奠諸州縣宜依舊用牲牢其屬縣用酒脯十九年停牲牢仍用酒脯二十年開元禮成定皇太子及諸州釋奠儀二十六年勅鄉貢謁先師著爲例二十七年秋八月詔曰弘我王化

在乎儒術能發揮此道啓迪含靈則生人以來未有如夫子者也所謂自天攸縱將聖多能德配乾坤身揭日月故能立天下之大本成天下之大經美教政移風俗君君臣臣父父子子人到於今受其賜不其猗歟於戲楚王莫封魯公不用俾夫大聖才列陪臣棲遲旅人固可知矣年祀寢遠光靈益彰雖代有褒稱而未爲崇峻不副於實人其謂何朕以薄德祗膺寶命思闡文明光被華夏時則異於古今情每重於師資旣行其教合旌厥德爰申盛禮載表徽猷夫子旣稱先聖可追諡爲文宣王宜令三公持節冊命至如辨方正位著自禮經苟非得所何以示則昔緣周公南面夫子西坐今位旣有殊坐豈宜依舊宜補其墜典永作成式自今以後兩京國子監夫子皆南面坐十哲等東西列侍天下諸州亦準此且門人三千見稱十哲包夫衆美實越等夷暢元聖之風規發人倫之耳目並宜褒贈以寵賢明顏子旣云亞聖須優其秩可贈充公閔子騫可贈費侯冉伯牛可贈

鄆侯冉仲弓可贈薛侯冉子有可贈徐侯仲子路可贈衛侯宰子我
可贈齊侯端木子貢可贈黎侯言子游可贈吳侯卜子夏可贈魏侯
又孔子格言參也稱魯雖居七十之數不載四科之目頃雖參於十
哲終未殊於等倫久稽先旨俾循舊位庶乎禮得其序人焉式瞻又
詔曰道可褒崇豈限今古追贈之典旌德存焉夫子十哲之外曾參
等六十七人同升孔門博習儒術子之四教爾實行之親授教言式
揚大義是稱達者不其盛歟欽若古風載崇元聖至於十哲亦被寵
章而子與之倫未有稱謂宜亞四科之士以疏五等之封俾與先師
咸膺盛禮乃贈曾參成伯顓孫師陳伯澹臺滅明江伯宓子賤單伯
原憲原伯公冶長莒伯南宮适郊伯公哲哀郕伯曾點宿伯顏路杞
伯商瞿蒙伯高柴共伯漆雕開滕伯公伯寮任伯司馬牛向伯樊遲
樊伯有若卜伯公西赤邵伯巫馬期鄒伯梁鱣梁伯顏柳蕭伯冉孺
郈伯曹卹豐伯伯虔鄒伯公孫龍黃伯冉季產東平伯秦子南少梁

伯漆雕斂武城伯顏子驕琅邪伯漆雕徒父須句伯壤駟赤北徵伯
商澤睢陽伯石作蜀郿邑伯任不齊任城伯公夏首亢父伯公良孺
東牟伯后處營邱伯秦開彭衙伯奚容蒧下邳伯公肩定新田伯顏
襄臨沂伯鄒單銅鞮伯句井疆淇陽伯罕父黑乘邱伯秦商上洛伯
申黨召陵伯公祖子之期思伯榮子旗雩婁伯縣成鉅野伯左人郢
臨淄伯燕伋漁陽伯鄭子徒滎陽伯秦非汧陽伯施常乘氏伯顏噲
朱虛伯步叔乘淳于伯顏之僕東武伯原亢籍萊蕪伯樂欬昌平伯
廉潔莒父伯顏何開陽伯叔仲會瑕邱伯狄黑臨濟伯邽巽平陸伯
孔忠汶陽伯公西與如重邱伯公西蒧祝阿伯遣尙書左丞相裴耀
卿就國子廟行冊禮又遣太子少保崔琳就東都行禮又勅兩京及
兗州舊宅廟皆改冕服其諸州縣廟宇旣小但移南面不須改衣服
兩京牲用太牢樂宮縣舞六佾州縣則牲以少牢而無樂右諸賢封
爵考新唐書及唐會要所載除十哲外祇六十七人而杜氏通典則

多衛伯遽瑗清河伯林放穎伯陳亢魯伯申棖伯琴牢南陵伯琴張六人兩處互異並錄於此二十八年詔春秋二仲上丁以三公攝行事肅宗上元元年以歲旱罷中小祀而文宣王廟祭不廢代宗永泰二年修國學祠堂成始釋奠設宮縣自復二京惟正會之樂用宮縣郊廟之享登歌而已文武二舞亦不具至是魚朝恩典監事乃奏宮縣於論堂而雜以教坊工伎初釋奠祝版御署訖北面而揖十五年膳部郎中歸崇敬以爲其禮太重請準武王受丹書於師尙父東面行禮詔從之後唐明宗長興三年國子博士蔡同文奏伏見每年春秋二仲月上丁釋奠文宣王以兗公顏子配坐以閔子騫等爲十哲排祭奠其七十二賢圖形於四壁面前皆無酒脯自今後請各設一豆一爵祠饗下中書帖太常禮院檢討禮例禮院檢郊祀錄稱文宣王從祀諸座各饗二實以栗黃牛脯豆二實以葵菹鹿醢簋簋各一實以黍稷飯酒爵一禮文所設祭器無一豆一爵之儀者奉勅文

宣王廟四壁英賢自此每釋奠宜準郊祀錄各陳脯醢等以祭周太祖顯德二年詔營國子監遼太祖神冊三年夏五月帝問侍臣曰受命之君當事天敬神有大功德者朕欲祀之何先皆以佛對帝曰佛非中國教太子倍曰孔子大聖萬世所尊宜先帝大悅卽命建孔子廟詔皇太子春秋釋奠道宗清寧六年夏六月命以時祭先聖先師宋太建隆元年春二月帝幸國子監詔增修祠宇繪先聖先賢先儒之象親撰先聖亞聖贊十哲以下命文臣分贊之二年詔貢舉人就國子監謁先師著爲令三年詔祭文宣王用一品禮立十六戟於廟門真宗景德三年從資政殿大學士王欽若請令諸道修葺文宣王廟禁不得殘毀四年太常禮院李維奏諸州釋奠長吏不親行禮非尊師重教意乃頒釋奠儀於天下大中祥符元年冬十一月戊午詔曰王者順考古道懋建大猷崇四術以化民昭宣教本總百王而致治不變人文方啓迪於素風思丕揚於鴻烈先聖文宣王道膺上

聖體自生知以天縱之多能實人倫之先覺元功侔於簡易景鑠配
乎貞明惟列辟以尊崇爲億載之師表肆朕寡昧欽承命歷曷嘗不
遵守彝訓保乂中區屬以祗若元符告成喬嶽觀風廣魯之地飭駕
數仞之牆躬謁遺祠緬懷遐躅仰明靈之如在肅奠獻以惟寅是用
攷簡冊之文昭聰叡之德聿舉追崇之禮庶申嚴奉之心備物典章
垂之不朽誕告多士昭示朕懷宜追謚曰諱廟聖文宣王遣吏部尙
書張齊賢祭告初帝欲追封孔子爲帝或曰宣父周之陪臣周止稱
王不當加帝號故第增美號而已又詔曰朕以祗陟岱宗新巡魯甸
永懷先聖之德躬造闕里之庭奠獻周旋欽崇備至惟降靈之所自
亦錫美之有初像設具存名稱斯闕宜加追命以燦典章叔梁紇可
追封齊國公顏氏可追封魯國太夫人遣都官員外郎王勵精虔祭
告又詔曰朕時巡魯郡躬詣孔堂顧風教之所尊舉典章而旣渥眷
惟令淑作合聖靈載稽簡冊之文尙闕封崇之數屬茲咸秩特示追

榮垂厥方來式昭遺範元官氏可追封鄆國夫人仍令兗州遣官詣
曲阜廟祭告二年春三月頒曲阜廟相圭一加冕九旒服九章從上
公之制夏五月乙卯詔追封孔子弟子顏回兗國公閔損琅邪公冉
耕東平公冉雍下邳公宰予臨淄公端木賜黎陽公冉求彭城公仲
由河內公言偃丹陽公卜商河東公會參瑕邱侯顓孫師宛邱侯澹
臺滅明金鄉侯宓不齊單父侯原憲任城侯公冶長高密侯南宮适
龔邱侯公皙哀北海侯曾點萊蕪侯顏無繇曲阜侯商瞿須昌侯高
柴共城侯漆雕開平輿侯公伯寮壽張侯司馬耕楚邱侯樊須益都
侯公西赤鉅野侯有若平陰侯巫馬施東阿侯陳亢南頓侯梁鱣千
乘侯顏辛陽穀侯冉孺臨沂侯冉季諸城侯伯虔沐陽侯公孫龍枝
江侯秦冉新息侯秦祖鄆城侯漆雕哆濮陽侯顏高雷澤侯漆雕徒
父高苑侯壤駟赤上邽侯林放長山侯商澤鄒平侯石作蜀成紀侯
任不齊當陽侯申棖文登侯公良孺牟平侯曹卬上蔡侯奚容點濟

陽侯句井疆滏陽侯申黨蒲川侯公祖句茲卽墨侯榮旂朕次侯縣
成武城侯左人郢南華侯燕伋汧源侯鄭國胙山侯秦非華亭侯施
之常臨濮侯顏曾濟陰侯步叔乘博昌侯顏之僕宛句侯遼瑗內黃
侯叔仲會博平侯顏何堂邑侯狄黑林慮侯邽巽高堂侯孔忠鄆城
侯公西興如臨朐侯公西黠徐城侯琴張頓邱侯七月戊寅又詔封
左邱明瑕邱伯公羊高臨淄伯穀梁赤龔邱伯伏勝乘氏伯高堂生
萊蕪伯戴聖楚邱伯毛萇樂壽伯孔安國曲阜伯劉向彭城伯鄭眾
中牟伯杜子春緱氏伯馬融扶風伯盧植良鄉伯鄭康成高密伯服
虔滎陽伯賈逵岐陽伯何休任城伯王弼偃師伯范甯新野伯至王
肅生前已封蘭陵亭侯加贈爲司空杜預生前已封當陽侯加贈爲
司徒又詔曰朕乃者封繼禪社昭列聖之鴻勳崇德報功廣百王之
彝制洎言旋於闕里遂躬謁於魯堂瞻河海之姿睟容穆若出洙泗
之上高風凜然舉盛典之有加期斯文之益振由是推恩世胄併錫

其寵章祀事祠庭廣增其奉邑復念性與天道德冠生民議茲口

廟

聖之名冀廣嚴師之道兼朕親爲製贊以表崇儒至於四科鉅賢並
超五等七十達者俱贈列侯伊彼先儒皆傳聖道咸加贈典俾耀素
風仍命寮案分紀遺烈式晉褒揚之旨庶資善誘之方中書樞密三
司兩制丞郎待制館閣直館校理等分撰贊成命刻石國學及曲阜
廟中三年以判國子監孫奭言國學丁祭差太尉太常光祿卿充三
獻官又頒釋奠儀注及祭器圖於諸路四年夏五月癸巳詔州城置
孔子廟五年冬十二月壬申以國諱改諡孔子曰至聖文宣王七年
從宰相王旦請以先天節禮畢詣文宣王廟行禮仁宗明道元年秋
八月戊午詔國子監重修七十二賢堂左邱明而下二十一人悉以
本品衣冠圖之景祐元年詔釋奠用登歌神宗熙寧五年罷貢舉人
釋奠七年判國子監常秩等請立孟軻揚雄像於廟庭兼賜爵號又
請追尊孔子以帝號下兩制禮官詳定以爲非是而止京兆府學教

授蔣夔請以顏回爲兗國公母稱先師而祭不讀祝儀物一切降殺而進閔子騫九人亦載祀典禮官以孔子顏子稱號歷代各有據依難輒更改儀物獻祝亦難降殺所請九人已在祀典熙寧祀儀十哲皆爲從祀惟州縣釋奠未載請自今二京及諸州春秋釋奠並準熙寧祀儀八年國子監新廟成常秩等又曰宣聖神像舊用冕服九旒七十二賢二十一先儒並用朝服檢會唐開元中尊孔子爲文宣王內出王者袞冕之服以衣之詳此則孔子之冕宜用天子之制十二旒孔子旣用冕旒則七十二賢二十一先儒當各依本爵用冕服欲乞改正下太常禮院詳定禮院檢會文宣王廟自建隆三年詔廟門準儀制令立戟十六枝用正一品之禮大中祥符二年賜曲阜文宣王廟桓圭一從上公之制春秋釋奠則用中祠皆今朝之制也其兗國公顏子等皆以本朝郡國縣封爵緣古今禮制不一難以追周之冕服宜如舊制依官品衣服今文宣王冕用九旒顏子已下各依郡

川伯從祀五年詔鄒縣孟子廟以樂正子配享公孫丑以下從祀封
樂正子克利國侯公孫丑壽光伯萬章博興伯告子不害東阿伯孟
仲子新泰伯陳臻逢萊伯充虞昌樂伯屋廬連奉符伯徐辟仙源伯
陳代沂水伯彭更雷澤伯公都子平陰伯咸邱蒙須城伯高子泗水
伯桃應膠水伯盆成括萊陽伯季孫豐城伯子叔承陽伯欽宗靖康
元年夏五月戊辰以右諫議大夫楊時言王安石學術之謬乞追奪
王爵明詔中外毀去配享之像使邪說淫辭不爲學者之惑詔降王
安石依鄭康成例從祀兩廡高宗紹興八年夏六月以衍聖公孔玠
渡江隔絕林廟詔衢州於官田內撥給五頃以奉先聖祀事十年秋
七月從王普之請詔改京師釋奠文宣王爲大祀祀前受誓戒加籩
豆十二其禮如社稷州縣仍爲中祀孝宗乾道八年令有司討論釋
奠及皇太子入學儀淳熙三年洪邁言孟子配食與顏子並其師子
思子思之師曾子皆在其下於禮儀實爲未然乞改正又趙粹中請

削去王安石從祀皆不報四年秋七月乙酉始詔去王雱從祀畫像
時祕閣修撰權禮部侍郎李燾論釋奠從祀孔子當升范仲淹歐陽
修司馬光蘇軾黜王安石父子眾議不叶止黜王雱而已七年禮官
請依國子監位數爵號姓名及祭器頒於州縣從之寧宗慶元元年
仍定文宣王爲中祀理宗寶慶三年春正月己巳詔曰朕觀朱熹集
註大學論語孟子中庸發揮聖賢蘊奧有補治道朕勵志學問緬懷
典型可特贈太師追封信國公紹定三年改封徽國公端平二年春
正月甲寅詔升子思於十哲又下廷臣議胡瑗孫明復邵雍歐陽修
周敦頤司馬光蘇軾張載程頤程頤等十人從祀議久未決淳祐元
年春正月帝將祀太學甲辰降御札曰朕惟孔子之道自孟軻後不
得其傳至我朝周敦頤程頤張載真見力踐深探聖域千載絕
學始有指歸中興以來又得朱熹精思明辨表裏融渾使中庸大學
語孟之書本末洞徹孔子之道益以大明於世朕每讀五臣論著啓

沃良多今視學有曰宜令學官列諸從祀以副朕崇獎儒先之意乃封敦頤汝南伯頤河南伯頤伊陽伯載郇伯尋以王安石謂天命不足畏祖宗不足法人言不足恤爲萬世罪人豈宜從祀孔子廟庭黜之景定二年春正月皇太子將釋奠詔曰虎闌齒胄太子事也此禮廢久矣如釋奠釋菜之事我朝未嘗廢也然尊師敬道又不可拘舊制可令太子謁拜焉丁丑皇太子祔既釋奠還奏曰先聖之道至我朝盛時運際文明真儒迭起而後有以續夫孟氏之傳然其時諸說並駕未知統一迨乾淳閒文公臣朱熹與宣公臣張栻成公臣呂祖謙志同道合切磋講磨如義利之辨如近思錄之書擇精語詳開牖後學誠有功於聖門中閒邪說又幾晦蝕陛下聖德奮興罷斥詖邪表章正學然後人心一正聖道大明天下學士得沿淵源而邇洙泗實萬世無疆之休今熹已秩從祀而栻祖謙尙未奉明詔臣竊望焉於是詔追封張栻華陽伯呂祖謙開封伯並從祀度宗咸淳三年春

正月帝將臨太學降御札曰邵雍天挺人豪英雄蓋世司馬光有德有言有功有烈朱熹贊其與周程張俱雍述經世書發先天之奧旨而內聖外王之學實關吾道光著通鑑貽後世治法而真履實踐之爲時儒宗茲豈前代諸儒或以章句文詞得祀於學者比朕將臨辟雍因思朱熹所贊已祀其四而尙遺雍光非缺典與其令學官列諸從祀以示崇獎又特封雍新安伯又詔曰孔子獨稱顏回好學固非三千之徒所同也而其學不傳得聖傳者獨曾子曾子傳子思子思傳孟軻忠恕兩語深契一貫之旨中庸一書丕闡前世之蘊而孔子之道益著向非顏曾思孟相繼演繹著書垂訓中更管商楊墨佛老幾何其不遂泯哉今大成惟顏孟侑食曾思不預尙爲闕典先皇帝述道統之傳自伏羲以來著十三贊孔子而下顏曾思孟昭然具在其非以遺我後人乎其令禮官議可升曾思侑食並議可升十哲者以聞是年春二月封曾參郕國公子思沂國公與顏孟並配享封顯

孫師爲陳公升於十哲更封閔損爲費公冉耕爲鄆公冉雍爲薛公宰子爲齊公端木賜爲黎公冉求爲徐公仲由爲衛公言偃爲吳公卜商爲魏公又詔曰泗水侯孔鯉以先聖爲之父以子思爲之子而聞詩聞禮周南召南之學其在魯論著明如此鄆城侯孔忠其昆也亦在從祀之列伯魚可列於鄆城侯之次金天會十五年熙宗新卽位詔立孔子廟於上京世宗大定十四年從國子監言定釋奠儀禮行三獻樂用登歌其儀節多取開元禮又考周制冕服加聖像冕十二旒服十二章初孟子以燕服在後寢至是遷於正殿與顏子對二賢冕服並用九章九旒章宗明昌二年夏五月戊辰詔諸郡邑文宣王廟墮廢者復之三年冬十一月丙子詔臣庶名犯古今帝王而姓復同者禁之周公孔子之名亦令迴避承安二年春丁帝親釋奠勅先賢先儒舊封公者升爲國公侯者升爲國侯卿伯以下皆封侯泰和四年春二月癸丑詔刺史州郡無宣聖廟學者並增修之五年春

三月諭有司進士名有犯孔子諱者避之著爲令元太祖初平燕京從宣撫王楫請以金樞密院爲宣聖廟太宗五年冬十二月勅修孔子廟八年春三月復修孔子廟世祖中統二年夏六月乙卯詔宣聖廟及管内書院有司歲時致祭月朔釋奠禁諸官員使臣軍馬毋得侵擾褻瀆秋八月丁酉命開平守臣釋奠於宣聖廟至元四年夏五月丁亥勅上都重建孔子廟十年御史中丞兼領侍儀司上言至聖文宣王用王者禮樂御王者衣冠南面當坐天子供祠具萬世之絕尊千載之通祀者莫如吾夫子也竊見外路官員提學教授每遇春秋二丁不變常服以供執事於禮未宜於是詔春秋二丁執事官員各依品序公服陪位諸儒襴衫唐巾行禮二十三年命雲南諸路皆建學祀先聖三十一年成宗卽位秋七月壬戌詔以孔子之道垂憲萬世有國家者所當崇奉凡廟學書院諸官員使臣軍馬不得侵擾褻瀆其贍學土地毋許侵奪專以供祭祀贍師生修廟宇大德六年

夏六月甲子詔建文宣王廟於京師先是京師未有孔子廟而國學寓於他署至是左丞相哈剌哈孫乃始奏建十年秋八月丁巳文宣王廟成行釋奠禮牲用太牢樂用登歌十一年武宗卽位秋七月辛巳詔曰蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承不緒敬仰休風循治古之良規舉追封之盛典加號大成至聖文宣王遣使闕里祀以太牢於戲父子之親君臣之義永惟聖教之尊天地之大日月之明奚罄名言之妙尙資神化祚我皇元仁宗皇慶二年夏六月甲申詔以宋儒周敦頤程顥程頤張載邵雍司馬光朱熹張栻呂祖謙及故中書左丞許衡從祀孔子廟庭初曾子子思於南宋咸淳閒雖躋配位而元人未用其制延祐三年秋七月以御史中丞趙世延言南北祭禮不宜有異乃詔春秋釋奠以顏曾思孟配享又詔封孟子父激爲邾國公母仉氏爲邾國宣獻夫人六年冬十二

月壬戌追封周敦頤爲道國公又封遠瑗爲內黃侯從祀至順元年
閏七月戊申詔曰闕里有家系出神明之胄尼山請禱天啓聖人之
生朕聿觀人文敷求往哲維孔氏之有作集羣聖之大成原道統則
堯授舜傳至周文王論世家則契之湯下逮正考父其明德也遠矣
故生知者出焉有開必先克昌厥後如太極之生天地如滄海之有
本源雲仍旣襲於上公之封考妣宜脉夫素王之爵於戲君子之道
考而不謬建而不悖於以敦典而敘倫宗廟之禮愛其所親敬其所
尊於以報功而崇德尙篤其慶以相斯文齊國公叔梁紇可加封爲
啓聖王魯國太夫人顏氏可加封爲啓聖王太夫人又詔曰昔曾子
得聖人之傳而子思克承厥緒稽夫中庸之一書實開聖學於千載
朕自臨御以來每以加惠斯文爲念萬幾之暇覽睹載籍至於致中
和而天地位萬物育雅畱意焉夫爵秩之崇旣隆於升配景行之懿
可後於褒嘉於戲有仲尼作於前孰儼世家之盛得孟子振其後益

昌斯道之傳渥命其承茂隆丕緒可加封沂國述聖公時並封顏子
兗國復聖公會子戚國宗聖公孟子鄒國亞聖公程顥豫國公程頤
洛國公冬十二月己酉詔以董仲舒從祀孔子廟位列七十子下三
年春正月壬午詔曰我國家惇典禮以彌文本闡門而成教乃睠素
王之廟尙虛元勰之封有其舉之斯爲盛矣大成至聖文宣王妻元
官氏來嬪聖室垂裕世家籩豆大房自流風於殷禮琴瑟在御存燕
樂於魯堂功言邈若於遺聞儀範儼乎其合德作爾禕衣之像稱其
命鼎之名噫秩秩彝倫吾欲廣關雎鵲巢之化皇皇文治天其興河
圖鳳鳥之祥可特封大成至聖文宣王夫人五月加封顏子父無繇
爲杞國公諡文裕母姜氏爲杞國端獻夫人妻戴氏爲兗國貞素夫
人順帝元統元年命江浙行省範銅造和寧宣聖廟祭器凡百三十
有五事至元五年以闕里上丁在邇特遣御史從事高元肅驛致尙
醴供禋酌之用至正十九年秋八月浙江行省照磨胡喻言於行省

曰我朝旣已加封先聖大成之號又追崇宋儒周敦頤等封爵俾從祀廟庭報功示勸之道可謂至矣然有司討論未盡尙遺先儒楊時等五人未列從祀遂使盛明之世猶有闕典惟故宋龍圖閣直學士楊時親得程門道統之傳排王氏經義之謬南渡後朱張呂氏之學其源委脈絡皆出於時處士李侗傳河洛之學以授朱熹凡集註所引師說卽其講論之旨中書舍人胡安國聞道伊洛志在春秋纂爲集傳羽翼正經明天理而扶世教有功於聖人之門贈太師榮國公蔡沉從學朱子親承指授著書集傳發明先儒之未及翰林學士參知政事真德秀博學窮經踐履篤實當時立僞學之禁以錮善類德秀晚出獨以斯文爲己任講習躬行此五人者學問接道統之傳著述發先儒之祕其功甚大況科舉取士已將胡安國春秋蔡沉尙書集傳表章而尊用之真德秀大學衍義亦備經筵講讀俱應追錫名爵從祀先聖廟庭可以敦厚儒風激勸後學行省以聞下廷臣議乃

允其封爵之請二十二年秋八月封楊時吳國公李侂越國公胡安國楚國公蔡沉建國公真德秀福國公俱贈太師而從祀之議竟寢冬十二月追諡朱熹父松曰靖獻改封熹爲齊國公明太祖洪武元年詔復孔顏孟三氏子孫徭役定制每歲春秋上丁釋奠前祀一日皇帝皮弁服御奉天殿降香傳制遣官以丞相初獻翰林學士國子祭酒亞終獻牲用太牢樂六奏文舞六佾司府州縣衛學各提調官行事用少牢禮如太學樂不能備則已京府及附府縣行釋菜禮時江西崇仁縣訓導羅恢上疏云孔廟從祀當以道學論論語記有若言行者四皆有裨世教記宰子言行者四皆見責聖人宜以有若居十哲而宰子居兩廡公伯寮阻壞聖門不宜從祀遽伯玉孔子故人行年六十而化今在兩廡六十位次之下未當宜升聖殿不報三年夏六月戊午詔曰自有元失馭羣雄鼎沸土宇分裂聲教不同朕奮起布衣以安民爲念訓將練兵平定華夷大統以正永惟爲治之道

必本於禮考諸祀典知五嶽五鎮四海四瀆之封起自唐世崇名美號歷代有加在朕思之則有不然夫嶽鎮海瀆皆高山廣水自天地開闢以至於今英靈之氣萃而爲神必皆受命於上帝幽微莫測豈國家封號之所可加瀆禮不經莫此爲甚至如忠臣烈士雖可加以封號亦惟當時爲宜夫禮所以明神人正名分不可僭差今合依古定制凡嶽鎮海瀆並去其前代所封名號止以山水本名稱其神郡縣城隍神號一體改正歷代忠臣烈士亦依當時初封以爲實號後世溢美之稱皆與革去其孔子善明先王之要道爲天下師以濟後世非有功於一方一時者可比所有封爵宜仍其舊庶幾神人之際名正言順於禮爲當用稱朕以禮祀神之意又命曲阜廟庭歲官給牲幣俾衍聖公供祀事四年令進士釋褐詣國學行釋菜禮更定祭器禮物樂舞改八簋豆爲十簋豆簠簋登銅悉易以瓷牲用熟各置高案樂舞生擇監生及文武大臣子弟在學者預教習之時國子司

業宋濂與考祀孔子之禮上議曰世之言禮者咸法孔子然不以禮祀孔子是褻祀也褻祀不敬不敬無福古者將祭主人朝服卽位於阼階東西面祝告利成主人立於阼階上西面尸出主人降立於阼階東西面此皆主人之正位也卒醑祝盥手洗升自西階主人盥升自東階祝先入南面主人從戶內西向祝酌奠主人西面再拜稽首皆爲几筵之在西也尸升筵主人西面立於戶內拜妥尸尸酢主人主人西面奠爵拜皆爲尸之在西也漢章帝幸魯祀孔子帝升廟西向是猶有古意也今襲開元二十七年之制遷神於南面而行禮者北面已非神道尙右之義矣古者造木主以棲神天子諸侯廟皆有主大夫東帛士結茅爲鼓無設像之事今因開元八年之制搏土而肖像焉則失神而明之之義矣古者灌鬯煇蕭求神於陰陽也今用薰薝代之古者郊廟祭享皆設庭燎示嚴敬也今以秉炬當之古之有道有德者使教焉死則以爲樂祖祭於瞽宗謂之先師若漢禮

有高堂生樂有制氏詩有毛公書有伏生之類也凡始立學者必釋奠於先聖先師非其師弗學也非其樂弗祭也學校既廢天下莫知所師開元禮以孔子集羣聖之大成顏回曾參孔伋孟軻實得孔子之道尊之以爲先聖先師而七十二子俱得通祀於天下固宜今也雜寘而妄列甚至荀况之言性惡揚雄之事王莽王弼之宗老莊賈逵之忽細行杜預之建短喪馬融之附權勢亦廁其中古者立學專以明倫子雖齊聖不先父食故禹不先鯀湯不先契文武不先不窋宋祖帝乙鄭祖厲王猶尙祖也今一切寘而不講顏回曾參孔伋子也配享堂上顏路曾點孔鯉父也列祀廡間張載則二程之表叔也乃坐其下顛倒彝倫莫此爲甚古者士之見師以菜爲贄故始入學者必釋菜以禮其先師其學官四時之祭乃皆釋奠今專用春秋亦非禮意釋奠有樂無尸而釋菜無樂是二者之輕重係乎樂之有無也今則襲用魏漢津所製大晟之樂乃先儒所謂亂世之音古者釋

實釋菜名義雖存而儀注皆不可考唐開元禮彷彿儀禮饋食篇節文爲詳所謂三獻各於獻後飲福卽尸酢主人主婦及賓之義也今憚其煩惟於初獻行之若夫廟制之非宜冕服之無章器用雜乎雅俗升降昧乎左右如此類甚多雖更僕不可盡也昔者建安熊氏欲以伏羲爲道統之宗神農黃帝堯舜禹湯文武各以次而列焉皐陶伊尹太公周公暨稷契夷益傳說箕子皆天子公卿之師式宜秩視天子之學若孔子實兼祖述憲章之任其爲通祀則自天子下達苟如其言則道益尊三皇不汨於醫師太公不辱於武夫矣昔周有天下立四代之學學有先聖虞庠以舜夏學以禹殷學以湯東膠以文王復取當時左右四聖贊成其德業者爲之先師以配享焉此固天子立學之法也議上帝不悅責其議不以時上謫安遠知縣議亦不果行五年帝覽孟子草芥寇讎語謂非人臣所宜言詔罷配享有諫者以大不敬論刑部尙書錢唐抗疏入諫曰臣爲孟子死死有餘榮

時廷臣無不爲唐危帝鑒其誠懇不之罪踰年帝尋悟乃下詔曰孟子辨異端闢邪說以發明孔子之道宜配享如故十五年春三月丙戌帝諭禮部尙書劉仲質曰孔子明帝王之道以教後世使君君臣臣父父子子綱常以正彝倫攸敘其功參乎天地今天下郡縣廟學並建而報祀之禮止行京師豈非闕典卿與諸臣其定釋奠禮儀以聞於是始詔天下儒學每歲春秋仲月通祀孔子頒釋奠儀注凡府州縣學饗豆以八器物牲牢皆殺於國學其祭以正官行之初洪武二年詔春秋釋奠止行於曲阜天下不必通祀錢唐伏闕上疏言孔子垂教萬世天下共尊其教故天下得通祀孔子報本之禮不可廢刑部侍郎徐程亦疏言古今祀典獨社稷三皇與孔子通祀天下民非社稷三皇則無以生非孔子之道則無以立堯舜禹湯文武周公皆聖人也然發揮三綱五常之道載之於經儀範百王師表萬世使世愈降兩人極不墜者孔子力也孔子以道設教天下祀之非祀其

人祀其教也祀其道也今使天下之人讀其書由其教行其道而不得舉其祀非所以維人心扶世教也疏入皆不報至是乃用其言夏五月南京新建太學成去塑像設木主帝遣官以太牢祭告十七年孟氏子孫有以罪輸作京師者二人帝曰大賢之後雖有罪亦當屈法宥之卽命遣還又諭工部曰孟子傳道有功名教歷年旣久子孫甚微近有以罪輸作者朕聞卽命釋之假令朕不知及或致死亡則賢者之後寢以衰滅豈禮先賢之意哉爾等宜加詢問凡有聖賢之後在輸作者依例釋之二十六年頒大成樂於天下郡縣之學於是始皆用樂二十九年行人司司副楊砥言漢揚雄仕莽爲大夫劇秦美新取譏萬世董仲舒三策及正誼明道之言足以扶翼世教請退雄進仲舒從之追封仲舒爲江都伯三十年以國學孔子廟監命工部擴其制成祖永樂元年秋八月建北京國子監新廟八年正文廟繪塑衣冠令合古制十九年北京國子監旣定其南監春祭命祭酒

行禮稱皇帝謹遣宣宗宣德三年以四川萬縣訓導李譯言命禮部
考正從祀先賢名位頒示天下英宗正統元年詔免凡聖賢子孫差
役選周程張朱諸儒子孫聰明俊秀可教養者不拘名數送所在儒
學讀書仍給廩饌二年從大學士楊士奇言以宋儒胡安國蔡沉真
德秀從祀三年禁天下祀孔子於釋老宮時有繪佛老夫子三像名
三聖祠者四川永川訓導諸華疏言之勅禮部通行禁革孔顏孟三
氏教授裴侃疏言天下文廟惟論傳道以列位次闕里家廟宜正父
子以敘彝倫顏子曾子子思子也配享殿庭無繇子皙伯魚父也從
祀廊廡非惟名分不正抑恐神不自安況叔梁紇元已追封啓聖王
創殿於大成殿西崇祀而顏孟之父俱封公惟伯魚子皙仍封侯乞
追封公爵顏孟父俱配啓聖王殿帝下禮部行之仍議加封伯魚
子皙封號八年湖廣慈利教諭蔣明請祀元儒吳澄於孔廟大學士
楊士奇等復以爲言乃追封臨川郡公從祀九年詔遷寧陵孔子廟

於儀封十三年詔改故元孔子像之左社者景帝景泰二年詔以顏子後希惠孟子後希文並爲翰林院五經博士世襲承祀此先賢後裔置博士之始六年春二月以兩廡祭品儉薄特增豕隻及黍稷果脯之數秋九月壬寅詔以周敦頤後晃程頤後克仁朱熹後居閩者梃並爲世襲五經博士英宗天順元年冬十二月奉先師像於文淵閣憲宗成化二年以大學士商輅言改封董仲舒廣川伯胡安國建寧伯蔡沉崇安伯真德秀浦城伯十二年祭酒周洪謨請加孔子美諡或封帝號或易大成至聖爲聖神廣運旣用天子冠服亦當用天子禮樂增籩豆爲十二舞佾爲八下禮部議尙書鄒幹等言聖神廣運伯益贊堯之詞不若大成至聖出於孟子中庸塑像晃十二旒衣十二章蓋因前元之舊非本朝之制且諡號器數之加否不足爲孔子輕重仍舊爲宜旣而洪謨又言自古帝王有天下莫不因所當因革所當革太祖高皇帝正祀典革百王封號惟孔子仍存舊封天下

郡縣皆有三皇廟像以民間不可褻瀆亦皆革去孔子塑像惟南京
大學易神主外餘悉仍舊所因所革皆以定一代之規垂萬世之法
豈可謂所革者爲本朝制所因者非本朝制乎又孔子之道不外乎
禮樂欲體孔子之道亦莫先乎禮樂今冕服旣用天子之禮而佾舞
則用諸侯之樂以禮論樂則樂不備以樂論禮則禮爲僭若因循不
加釐正後世必見非笑乞勅內閣大臣并六部三法司六科十三道
等官集議首正其封號表明孔子周人當用周制所封乃當時天王
之王非後世國王之王次增其器數爲十二籩豆舞八佾則禮不僭
樂不缺可以格神靈厚風化補前代缺略之典備聖朝尊崇之制誠
爲便益於是詔增籩豆爲十二樂用八佾十六年春二月辛酉命所
在過孔門者皆下馬孝宗弘治九年以大學士徐溥等建言追封楊
時將樂伯從祀位列司馬光之次武宗正德元年夏六月命南宗孔
彥繩爲世襲五經博士奉衢州孔子廟祀二年冬十一月以北宗孔

聞禮爲世襲五經博士子思子中庸書院祀十六年詔改建孔子家廟之在衢者世宗嘉靖二年以給事中戴銑等言命朱熹後裔居徽者墅爲世襲五經博士初議者欲改定文廟從祀諸賢及七十二子之祀禮部侍郎倪岳言馬融王弼之徒其立身不無可貶然秦漢以來六經出煨燼賴諸儒抱遺經專門講授經以復存唐之注疏咸祖其言而今之經傳引用尙多其說何可盡廢七十二子名字自馬遷以來相沿已久今生千百年後安敢臆定於是悉仍其舊後少詹程敏政又請黜馬融等八人之祀而祭酒謝鐸又請黜吳澄之祀給事中張九功并請罷荀况公伯寮蘧瑗等而進后蒼王通胡瑗時爲禮部尙書周洪謨傅瀚等所卻而止先是裴侃有請以顏曾思三子父列配啓聖之議但行之闕里未推於國學及天下郡縣學宮南京國學易像爲主北京猶未之改至是大學士張璁方以議禮得進九年冬十月乃緣帝意更定一切祀儀因疏請正文廟祀典曰夫子聖

人生不得位沒而以南面之禮尊之似矣然王君之號也夫子人臣也生非王爵死而諡之可乎哉蓋名者實之著也無其實有其名謂之淫名夫子生不獲有尺寸之土今而以有天下之號歸之曾謂無實之稱足以榮聖人乎哉書天降下民作之君作之師古者治教之職不分君卽師也二帝三王盡君師之責者也若夫子則不得君而師者也師也者君之所不得而臣者也故曰雖詔於天子無北面所以尊師也彼以王爵之貴爲隆於稱師者習俗之見也且歷代帝王所以尊孔子者尊其道也道之所在師之所在也故以天子而尊匹夫不嫌於屈使孔子無其道雖王天下豈足當萬代之祀稱帝稱王豈若稱先聖先師之合禮乎又有若曰自生民以來未有盛於孔子者也豈一言一行之善而可以節惠立諡文之爲言諡法有所謂經天緯地者孔子亦曰文王旣沒文不在茲乎以諡固亦幾矣若夫宣之爲言諡法美者不過聖善周聞而已豈足以盡聖人之大德哉又

朱熹曰先聖本不當設像春秋祭時只設主可也邱濬曰塑像之設中國無之自佛教入中國始有也姚燧有言北史敢有造泥銅人者門誅則泥人固非中土爲主以祀聖人法也後世莫覺其非亦化其道而爲之郡異縣殊不一其狀長短豐瘠老少美惡惟其工之巧拙是隨就使盡善亦豈其生時盛德之容甚非神而明之無聲無臭之道也夫國學廟貌非但師生瞻仰之所天子視學實於是乎致禮焉聖人百世之師坐而不起猶之可也若夫從祀諸儒皆前代搢紳或當代臣子君拜於下臣坐於上竊恐聖賢在天之靈亦有所不安也臣惟文廟之在南京者固已行聖祖之制今天下郡邑恐於勞民無俟改革惟國學乃天子臨視之所乞如聖祖之制又八佾十二籩豆天子之禮所以用於郊廟者也古之諸侯惟杞宋得用先代禮樂他雖周公有大功魯用天子禮樂孔子亦不欲觀以其僭也况今各府州縣可僭天子禮樂乎推孔子敬天之心肯安然享之而同於天乎

推孔子敬君之心又肯安然享之而同於天子乎又宋洪邁曰自唐以來以孔門高弟顏淵至子夏爲十哲坐祀於堂上其後升顏子配享則進曾子於堂顏子之父路曾子之父點乃在廡下從祀之列子思處父上神靈有知何以自安姚燧曰由孟子而視子思師也由子思而視曾子又師也子思孔子孫也弟子於師孫於祖坐而語道者有之非可並南面况又祀無絲點鯉於庭夫學宮將以明人倫於天下而倒施錯置如此奚以爲訓熊禾曰宜別設一室以齊國公叔梁紇居中南面顏路曾點孔鯉孟孫氏俛食東西向春秋二祀當先聖酌獻之時以齒德之尊者爲分獻官行禮於齊國公之前其配位亦如之如此則亦可以示有尊而教民孝矣臣愚乞下有司於各處廟學別立一祠如禾說庶不失以禮尊奉聖賢之意臣又竊觀聖學失傳千五百年至程朱出而後孟氏之統始續則程朱之先亦不可缺况程子之父珦首識濂溪周子於屬掾之中薦以自代而又使二子從

遊朱子之父松臨沒之時以朱子託其友籍溪胡氏而得程氏之學
珦以不附王安石新法退居於洛松以不附秦檜和議奉祠於閩其
歷官行已俱有足稱述臣愚乞將珦松從祀啓聖王使學者知道學
之傳有開必先明人倫之義不爲虛文矣又謹按程敏政奏曰唐貞
觀二十一年始以左邱明等二十二人從祀孔子廟庭當時聖學不
明議者無識拘於舊注釋奠先師如詩有毛公禮有高堂生書有伏
生之類遂以專門訓詁之學爲得聖道之傳而並及馬融等行之至
今臣考歷代正史馬融初應鄧騭之召爲校書郎中歷官南郡太守
以貪濁免官髡徙朔方自刺不除又不拘儒者之節前授生徒後列
女樂爲梁冀草奏殺忠臣李固作西第頌以美冀爲正直所羞五經
掃地劉向初以獻賦進喜誦神仙方術嘗上言黃金可成鑄作不驗
下吏當死其兄陽城侯救之獲免所著洪範五行傳最爲舛駁使箕
子經世微言流爲陰陽術家之小技賈逵以獻頌爲郎不修小節專

以傳會圖識以致貴顯蓋左道亂政之人也王弼與何晏俱爲清談所注易專祖老莊范甯追究晉室之亂以爲王何之罪深於桀紂何休春秋解詁一書黜周王魯又注風角等書班之於孝經論語蓋異端邪說之流也戴聖爲九江太守治行多不法懼何武劾之而自免後爲博士毀武於朝及子賓客爲盜繫獄而武平心決之得不死則又造謝不慚先儒謂聖禮家之宗而身爲賊吏子爲賊徒可爲世鑒王肅在魏以女適司馬昭當時昭篡魏之勢已成肅爲世臣封蘭陵侯官至中領軍乃坐視成敗及母邱儉文欽起兵討賊肅又爲司馬師畫策以濟其惡若好人佞己乃過之小者杜預所著止有左氏經傳集解其大節亦無可稱如守襄陽則數積遺洛中貴要語人曰懼其爲害耳非以求益也伐吳之際因斫瘦之譏盡殺江陵之人以吏則不廉以將則不義凡此諸人其於名教得罪非小而議者謂能守其遺經轉相授受以待後之學者不爲無功臣竊以爲不然夫守其

遺經若左邱明公羊高穀梁赤之於春秋伏勝孔安國之於書毛萇之於詩高堂生之於儀禮后蒼之於禮記杜子春之於周禮可以當之蓋秦火之後惟易以卜筮僅存餘經非此九人則幾乎熄矣此其功之不可泯者以之從祀可也若融等不過訓詁此九人所傳者耳况其書行於唐故唐姑以備經師之數祀之今當理學大明之後易用程朱詩用朱子書用蔡氏春秋用胡氏又何取於漢魏以來駁而不正之人使安享天下之祀哉夫所以祀之者非徒使學者誦其詩讀其書亦將識其人而使之尙友也臣恐學者習其訓詁之文於身心未必有補而考其奸諂淫邪貪墨怪妄之迹將自甘於效尤之地曰先賢亦若此哉其禍儒害道將有不可勝言者矣至於鄭眾盧植鄭康成服虔范甯五人雖若無過然其所行亦未能以窺聖門所著亦未能以發聖學若五人者得預從祀則漢唐以來當預者尙多臣愚乞將戴聖劉向賈逵馬融何休王肅王弼杜預八人禡爵罷祀鄭

眾盧植鄭康成服虔范甯五人各祀於其鄉后蒼在漢初說禮數萬言號后氏曲臺記戴聖等皆受其業蓋今禮記之書非后氏則不復傳於世矣乞加封爵與左邱明等一體從祀又孔子弟子見於家語自顏回而下七十六人家語之書出於孔氏當得其實而司馬遷史記所載多公伯寮秦冉顏何三人文翁成都廟壁所書又多蘧瑗林放申枨三人先儒謂後人以所見增益殆未可據臣考宋邢昺論語注疏申枨孔子弟子在家語作申續史記作申黨其實一也今廟庭從祀申枨封文登侯在東廡申黨封淄川侯在西廡重複無稽一至於此且公伯寮愬子路以沮孔子乃聖門之蝨虺而孔子稱瑗爲夫子決非及門之士林放雖嘗問禮然家語史記邢昺注疏朱子集注俱不載諸弟子之列秦冉顏何疑亦爲字畫相近之誤如申枨申黨者但不可考耳臣愚以爲申枨申黨位號宜存其一公伯寮秦冉顏何蘧瑗林放五人既不載於家語七十子之數宜罷其祀若瑗放二

人不可無祀則乞祀瑗於衛祀放於魯或附祭於本處鄉賢祠仍其舊爵以見優崇賢者之意亦庶乎名實相符而不舛於禮也又洪武二十九年行人司司副楊砥建議請黜揚雄進董仲舒太祖高皇帝嘉納其言而行之主張斯道以淑人心可謂大矣然苟况揚雄實相伯仲而况以性爲惡以禮爲僞以子思孟子爲亂天下以子張子夏子游爲賤儒故程子有苟卿過多揚雄過少之說今言者欲並黜其祀宜然也臣竊以爲漢儒莫如董仲舒唐儒莫如韓愈而尙有可議者一人文中子王通是也通之言行先儒之論已多大約以爲僭經而不得比於董韓云爾臣請斷之以程朱之說程子曰王通隱德君子也論其粹處殆非苟揚所及若續經之類皆非其作然則程子豈私於通哉正因其言之粹者而知其非僭經之人耳朱子曰文中子論治體處高似仲舒而本領不及爽似仲舒而純不及又曰韓子原道諸篇若非通所及者然終不免文士之習利達之求若覽觀古今

之變措諸事業恐未若通之精到懇惻而有條理也至於河汾師道之立出於魏晉佛老之餘迨今人以爲盛則通固豪傑之士也又宋儒自周子以下九人同列從祀而尙有可議者一人安定胡瑗是也瑗之言行先儒之論已詳大約以爲少著述而不比於濂洛云爾臣亦請斷以程子之說程子看詳學制曰宜建尊賢堂以延天下道德之士如胡瑗張載邵雍使學者得以矜式朱子小學書亦備載瑗事以爲百世之法臣以爲自秦漢以來師道之立未有過瑗者若以爲瑗無著述之功則元之許衡亦無著述但其身教之懿與瑗相望誠有不可偏廢者臣考之禮有道有德者使教焉死則以爲樂祖祭於瞽宗若通瑗兩人之師道百世如新得加封爵使與衡同祀於學宮最得禮意謝鐸奏曰孔廟從祀之賢實萬世瞻仰所係若臨川郡公吳澄著述雖不爲不多行檢則不無可議生長於淳祐貢舉於咸淳受宋之恩者已如此之久爲國子司業爲翰林學士歷元之官者乃

如彼其榮處中國而居然夷狄忘君親而不恥仇虜昔人謂其專務聖賢之學卓然進退之際不識聖賢之於進退果如是否乎如是而猶在從祀之列臣固不能以無惑舉人桂萼議曰嘗讀宋史朱熹疏釋四書及易詩傳通鑑綱目皆與元定參訂啓蒙一書則元定之橐又曰元定平生學問皆寓朱子書集又曰朱子論易推本圖書往往與元定往復而有發焉更復考其所著成書有律呂新書皇極指要洪範解大衍詳說等篇昔我太宗編集性理全書指要新書固已擢錄至於範數雖止入其子沉之所著沉蓋受於元定不由師傳而自得之也先王制祀以死勤事則祀之竊以元定蓋亦勤斯道而竄死與古以死勤事者同所宜從祀臣謹詳敘政所奏多正論可採弘治初禮部照例會官議率爲沮格不行及按孝宗實錄云鐸議吳澄不當從祀尙書傅瀚力詆鐸言爲謬又力稱前人之請爲有見不可遽易侍郎焦芳曰所謂前人者蓋楊士奇也今天下方議其當柄用之

際雖從祀大事猶能私庇其鄉人可又襲其非邪瀚竟引禮所謂凡祭有其舉之莫敢廢詩書所謂率由舊章監於成憲以文其說而於澄忘宋事元之大節略不及澄遂仍舊從祀而鐸議皆寢論者謂士奇之以澄欺宣廟非特私其鄉人而措意亦有在瀚不悟此則惟溺鄉里之私而不顧君臣之大倫正道統之攸繫乃據爲舊章成憲再不可議然則楊時奏黜王安石之配享當時安石豈無朝命而配享哉特其命雖出自朝廷而事實由臣下阿私所親以誤朝命而非天下之公議所以議之後世竟不以爲過也臣又按歐陽修乃有宋一代人物未與從祀嘗觀其所著本論實有翊衛聖道之功蘇軾曰自漢以來道術不出於孔氏而亂天下者多矣五百餘年而後得韓愈學者以配孟氏蓋庶幾焉愈之後三百有餘年而後得歐陽子其學推韓愈孟子以達於孔氏故天下翕然師尊之曰歐陽子今之韓愈也夫韓愈旣已從祀歐陽修豈可闕哉帝下其疏命禮部會翰林諸

臣議明日璵再疏陳孔子諡號之不可不正帝乃御製正孔子祀典說及申記璵又作正孔子廟祀典或問奏之并下禮部勅速議更正時翰林編修張堯徐階給事中王汝梅等極言其不可帝皆指爲繆論錄說記示之謫階延平府推官而御史黎貫等言周公成文武之德追王太王王季聖祖登極追崇德懿熙仁四祖皆爲皇帝是亦周人推本之意不以位論也至臣子如徐達等身沒之後追爵爲王或及其祖考是皆未有王號沒而追尊之也且初正祀典嶽瀆諸神皆去其號惟孔子如故良有深意存焉陛下疑孔子之祀上擬祀天之禮夫子之不可及也猶天之不可階而升也雖擬諸天似不爲過况其未也今必欲去王號以極尊崇之實減籩豆樂舞以別郊祀之禮夫有王號而後享王祀居王居若云先師則如高堂生毛公伏生之流非惟八佾十二籩豆爲僭六佾十籩豆亦爲僭矣非惟像當毀復屋重簷亦當毀矣自唐尊孔子爲文宣王已用天子禮樂宋真宗嘗

欲封孔子爲帝或言周止稱王不當加以帝號而羅從彥之論謂襲其舊可也帝王亦可也周敦頤謂萬世無窮王祀夫子邵雍謂仲尼以萬世爲主邵伯溫謂亘古今窮天地一人而已周洪謨亦謂以孔子周人不必稱帝猶之可也若謂陪臣非崇德報功之意其謂孔子不當稱王者止吳澄一人而已伏望博採羣言務求至當上不失聖祖之初意下不致天下之驚疑中不致禮意軒輊臣等幸甚疏上帝怒其指斥追尊事謂爲奸逆下法司按治褫官職爲民於是禮部會同內閣翰詹諸臣上言孔子享祭學宮本緣尊以先師之故自唐加王號而先師之名遂泯人以聖人爲至聖人以孔子爲至宋真宗稱孔子爲至聖其義已備今宜令兩京國子監及天下學校於孔子神位題稱至聖先師孔子去王號及大成文宣之稱改大成殿爲先師廟大成門爲廟門四配稱復聖顏子宗聖曾子述聖子思子亞聖孟子十哲以下凡及門弟子皆稱先賢某子左邱明以下皆稱先儒某

子去公侯伯爵依南京國子監規制製木主仍擬大小尺寸著爲定式其塑像國子監責祭酒等官學校責提學等盡行屏撤以別釋氏之教春秋祭祀遵舊制國學用十簋豆天下八簋豆以別郊廟之祀樂舞止用六佾凡學別立啓聖祠中祀叔梁題啓聖公孔氏神位以顏無繇曾點孔鯉孟孫氏配俱稱先賢某氏兩廡以程珦朱松蔡元定從祀俱稱先儒祭祀與文廟同日簋豆牲帛視四配東西配位視十哲從祀先儒視兩廡國學以祭酒主祭南京則以司業從祀申黨卽申棖宜存申棖去申黨公伯寮秦冉顏何荀況戴聖劉向賈逵馬融何休王肅王弼杜預吳澄十三人俱宜如所論罷祀林放蘧瑗鄭眾盧植鄭康成服虔范甯七人俱宜如所論各祀於鄉后蒼王通歐陽修胡瑗四人俱宜如所論增入從祀十一月奏上詔悉如議行帝乃親製祭文遣官告孔子曰自昔混沌之初天命羲農軒聖創世開物至堯舜禹湯文武周公以及先師列聖相繼奉天行道立教誨人

肆我聖祖再造區宇化行天下我聖祖崇禮於先師者御製有文典冊俱在予惟寡昧之人仰遵祖憲去前元褻慢之偶像如祖制尊崇之聖謨號稱核實俎豆究本以遵禮典兼體先師至意予實不聰賴先師默鑒及良輔洪儒所贊之也爰擇令辰特命大臣奉安先師神位以及配從之人於此惟先師鑒知永依陟降大運神化教我君民俾予性理蚤開而無負皇天付托之眷命暨士庶學業咸正而無違傳道之至情予實有望焉惟先師覺之又以行人薛侃言增陸九淵從祀是年初祀聖師於文華殿東間其制伏羲神農黃帝堯舜禹湯文武皆南面周公孔子東西相向經筵前一日帝親致祭服皮弁行釋奠禮每月朔望具果酒帝服黃袍行禮閒遣輔臣及大臣代十年國子監啓聖祠成十四年冬十一月庚辰置世襲國子學正奉儀封孔子廟祀以孔承寅承襲十八年春二月以曾子後質粹世襲五經博士穆宗隆慶五年給事中韓楫等十三道御史馬三樂等交章請

以故禮部侍郎薛瑄從祀而先時給事中趙軌御史周弘祖亦以爲言御史耿定向則以薛瑄及王守仁二人請給事中魏時亮又以瑄及陳獻章王守仁三人請俱下禮部會廷臣議是時議者頗詆王氏學而陳獻章亦閒有不與者獨於瑄則無異詞僉曰薛瑄方幼年一見濂洛諸書即歎曰此道學正脈也遂棄去詞賦專心於是其學以復性爲的以居敬窮理爲功以反躬踐履爲實潛心體究至老彌精充養之純超然自得平生言動舉止悉合於矩矱受取與一揆諸義居家則孝友無閒與人則樂易可親中正足以矯枉闢邪剛直足以廉頑立懦所有讀書錄河汾集雖不專以述作爲事而隻簡片言皆可師法微詞奧義悉合聖謨至今學者莫不尊信而誦習之至於立朝行己之際不折節於權門不謝恩於私室不屈法於貴近不懼志於臨刑榮辱無以關其心死生無以易其操故一時從學者有河東夫子之稱一代真儒之許至今無異議焉閒有疑其著述之寡者不

知學貴心得道在躬行矧瑄所著書且十餘萬言不爲不多於從祀爲宜議上於是詔以薛瑄從祀列於先儒呂祖謙之下命祭酒馬自強行釋奠禮以從祀告於先師孔子通行天下神宗萬歷間中外臣工又有以陳獻章王守仁及胡居仁蔡清羅倫章懋黃仲昭陳真晟吳與弼呂柟羅欽順鄒守益諸人請者下禮官及廷臣會議議久不決十二年禮部尙書沈鯉以胡居仁淵源孔孟純粹篤實請獨祀居仁而議者又謂守仁言致知出大學良知出孟子獻章博而能約誠足動人不可謂禪並宜崇祀一以明真儒之有用一以明實學之自得於是詔檢討陳獻章布衣胡居仁新建伯王守仁並從祀二十三年以湖廣巡撫郭惟賢等言詔以宋儒周敦頤之父輔成從祀啓聖祠又定每歲仲春秋上丁日御殿傳制遣大臣祭先師及配位其十哲以翰林官兩廡以國子監官各二員分獻初兩京國學先師廟皆用青瓦二十八年從司業傅新德請易以綠琉璃瓦四十四年巡按

山東御史畢懋康具疏請修曲阜孔子廟因附奏曰子思之不稱孔子避先聖也今西廡如忠如安國乃俱稱曰孔子不幾冒先聖之稱乎改忠爲先賢子蔑子安國爲先儒子國子皆以字行似爲妥當孟廡從祀有季孫子叔疑因趙岐注二子皆孟子門人故誤與從祀之列今旣遵紫陽解則其爲引言而非門人明甚况所謂季孫子叔疑恐亦當時執政之儔且不知其爲人祀之門牆甚無謂也益成括亦非孟子門人况見議於孟子此三人者似當依公伯察秦冉之例罷之嘉靖時輔臣張璁題正祀典世廟嘉納其言孔門弟子及諸從祀者並罷封爵乃孟子廟主尙稱鄒國亞聖公樂正子以下稱侯伯夫孔子已易王者之號而孟子猶號鄒公孟子主在配享者已定亞聖之稱而弟子猶稱侯伯諸賢冥冥之中必有不妥且非所以一王制而安神靈請倣孔廟近例改其稱號則舛謬正而祀典益光矣疏入雖得報聞然竟不果行四十七年從福建巡撫丁繼宗請以宋儒羅

從彥李侗從祀熹宗天啓二年詔以張載後文運爲世襲五經博士
莊烈帝崇禎三年河南巡撫李日宣上言孔廟從祀兩程並列今二
程已有世爵而大程獨無訪其嫡裔竟無可考請以二程之後名接
道者繼大程爲嗣予以世爵使奉祠廟詔從之乃以接道爲世襲五
經博士又以河南巡按吳牲請詔以邵雍後繼祖爲世襲五經博士
十四年秋八月帝諭禮部曰朕覽我聖祖命儒臣纂輯五經四書大
全其中傳注引證惟宋儒周子二程子朱子張子邵子爲多可見理
學大明於宋而周程張朱子大有功於聖門也今與周秦漢唐諸儒
並稱先儒竊爲不安茲欲特加崇隆是否可行著禮部翰林院國子
監禮科等衙門會同詳議時廷議周程六子宜稱先賢並請漢儒董
仲舒隋儒王通亦稱先賢且宋從祀至十八人今止四人爲太少宜
以吳與弼羅倫蔡清陳真晟陳琛呂柟王艮章懋羅洪先鄧元錫顧
憲成等從祀議上帝令候旨行十五年詔以左邱明親受經於聖人

改稱先賢并改周程張朱邵六子並稱先賢位七十子下漢唐諸儒上十六年詔以仲子後于堊爲世襲五經博士

國朝崇德元年

遣官祭孔子廟五年定春秋二仲上丁行釋奠禮順治元年定月朔及進士釋褐釋菜禮月望行香儀二年春正月國子監祭酒李若琳奏言臣聞備古今之至德者宜享古今之隆稱昔孔子之贊乾坤曰大哉乾元至哉坤元曰大成曰至聖洵非孔子之德配乾坤者莫能當之今稱至聖而遣大成得毋乾坤之義未備乎又諡法經天緯地曰文聖善周問曰宣洵非孔子之德兼君師者莫能當之今止稱先師而遣諡號然則古今之英君諡辟止曰某君某王而去聖神文武之諡可乎惟稱曰大成至聖文宣先師孔子庶至德隆名

昭代倍爲闡揚祀典於焉有光矣疏下禮臣議禮科都給事中龔鼎孳又言李若琳所請誠至當不易之論無俟臣言至伯舞益而八簋

豆益而十二雖曰天子禮樂然既素王奉之矣德足配天則不可以位限况聖功大於堯舜者哉且成均天子釋菜尊師之地以天子自尊其師而用天子禮樂誰曰不宜大成殿額更爲先師廟意存簡朴匪由舊章幾令峻極之宮牆不得與梵寺琳宮比美紳衿之士入駿奔而出瞻仰能不色沮心慙乎矧廟者統詞殿則棲身之所也譬之堂焉室焉各有其處安得渚之故大成殿之名不可不復宋元以來人品醇疵了然在人耳目嘉靖中登歐陽修而遺范仲淹仲淹力振綱常首扶神器兼於戎馬倥偬之際以中庸誨引張載俾成大儒彬彬乎歐陽子之右矣乃不得分片藻之末光不平孰甚乞下臣章合諸臣一併博議奉

世祖章皇帝聖旨加稱大成至聖文宣先師孔子既監科考訂僉同佳如議行一應禮儀還照明朝舊例不必更改十四年仍改號至聖先師孔子是年行經筵禮

親祭先師孔子以文華殿未成暫於弘德殿設位致祭康熙二十三年
聖祖仁皇帝幸魯

御書萬世師表四字懸大成殿明年

頒天下學宮二十五年文華殿告成設孔子神位於傳心殿三十九年
置閔氏端木氏世襲五經博士以其裔孫閔衍樞端木謙爲之四十
九年

詔直省同城大小武職照文職一體入聖廟行禮五十一年以先賢朱
子發明聖道軌於至正奉

旨特升配大成殿十哲之次又置言氏世襲五經博士以其裔孫德堅
爲之五十四年從江南學政余正健請以宋儒范仲淹從祀文廟五
十九年從山東巡撫李樹德請以卜子後尊賢爲世襲五經博士雍
正元年春三月甲午

世宗憲皇帝諭內閣禮部曰至聖先師孔子道冠古今德參天地樹百

王之模範立萬世之宗師其爲功於天下者至矣而水源木本積厚流光有開必先克昌厥後則聖人之祖考宜膺崇厚之褒封所以追溯前徽不忘所自也粵稽舊制孔子之父叔梁紇於宋真宗時追封啓聖公自宋以後歷代遵循而叔梁紇以上則向來未加封號亦未奉祀祠庭朕仰體

皇考崇儒重道之盛心敬修崇德報功之典禮意欲追封五代並享蒸嘗用仲景仰之誠庶慰羹牆之慕內閣禮部可會同確議具奏夏四月丁亥廷臣以孔子先世五代應俱封公節議上

上諭曰五倫爲百行之本天地君親師人所宜重而天地君親之義又賴師教以明自古師道無過於孔子誠首出之聖也我

皇考崇儒重道超軼千古凡尊崇孔子典禮無不備至朕蒙

皇考教育自幼讀書心切景仰欲再加尊崇更無可增之處故勅部追封孔子先世五代今部議封公上考歷代帝王皆有尊崇之典唐明

皇封孔子爲文宣王宋真宗加封至聖文宣王封孔子父叔梁紇爲齊國公元加封孔子爲大成至聖文宣王加封齊國公爲啓聖王至明嘉靖時猶以王係臣爵改稱爲至聖先師孔子改啓聖王爲啓聖公王公雖同屬尊稱朕意以爲王爵較尊孔子五代應否封王之處著問諸大臣具奏廷臣遵

旨更以追封王爵議上

詔追封木金父公爲肇聖王祈父公爲裕聖王防叔公爲詒聖王伯夏公爲昌聖王叔梁公爲啓聖王

遣禮部尙書張伯行詣闕里祭告行

冊封禮

冊曰右文稽古思統緒之相承重道尊師溯淵源於自遠舉千秋之曠典蘋藻維馨超五等之崇封絲綸式煥緬維先師孔子之五世祖木金父公系本殷朝居從魯國治惟尙質傳樸素之舊風貴而彌恭守

謙和之家法積功累行聿弘毓聖之基貽慶鍾祥遂極生民之盛朕
初登大寶欽想前規欲伸景仰之誠用議顯揚之制特追封爲肇聖
王錫之冊命於戲克昌厥後永立人倫之宗有開必先並膺素王之
號服茲嘉命垂示無窮又曰道高聖域宜推師表之源恩浹儒宗用
廣尊崇之典擬王封而晉秩禮軼古今定鴻號而加稱榮增洙泗緬
維先師孔子之高祖祈父公系出嫡宗望隆宋國姓分公族爲孔氏
之再傳瑞啓聖人逮宣尼而開出溯淵源於累葉知德盛而世昌鍾
靈秀於一人實教尊而功溥朕慕牆至聖寤寐前徽思敬禮之加隆
必恩綸之及遠特追封爲裕聖王錫之冊命於戲袞衣端冕視躬桓
蒲穀而彌尊春禴秋嘗與鳧繹龜蒙而並久膺茲寵命永荷鴻休又
曰聖人覺世道有開而必先王者尊師禮必隆於所自備緬揚之典
用煥千秋申嚮往之誠特超五瑞緬維先師孔子之曾祖防叔公殷
朝賢裔魯國儒宗潛德彌彰守高曾之矩矱詒謀自遠蘊詩禮之淵

源聿開天縱之能四科立教爰啓時中之聖一貫傳心朕寶歷初膺
前徽是式溯儀型而景仰加名號以褒崇特追封爲詒聖王錫之冊
命於戲俎豆常新峻秩與尼山並峙絲綸誕實恩光與泗水常流永
荷崇嘉昭垂無斁又曰化民善俗道首賴乎師資累行積功誼應推
夫祖德閱再傳而誕聖垂裕貽謀超五等而加封創興盛典緬維先
師孔子之祖伯夏公東山毓秀泗水鍾靈生秉禮守義之邦漸摩旣
久奉崇信尊賢之訓牖迪尤深集慶在躬早兆四科之教克昌厥後
遂開萬世之蒙朕寶歷初膺景行彌切推降祥之有自念顯號之宜
加特追封爲昌聖王錫之冊命於戲溯尼山之世澤茂績丕昭崇闕
里之家聲斯文益振服茲嘉命永式光榮又曰達天盡性溯道統之
攸傳崇德報功體孝思之不置惟誕生夫睿哲遂永樹乎師模用賁
徽章時升峻秩緬維先師孔子之父叔梁公望重魯邦業傳鄒邑秉
姿勇毅垂史傳之盛名積慶悠長衍家庭之令緒感殊祥於闕里兆

啓素王徽靈應於尼山通鍾至聖粵從前代顯贈上公當茲續緒之初更議推恩之典特追封爲啓聖王錫之冊命於戲澤惟裕後聿弘作述之規善則歸親宜極尊榮之禮儀型如在嘉命是承二年春三月乙亥朔

諭禮部等衙門曰治天下之要以崇儒重道廣勵學宮爲先務朕親詣太學釋奠先師禮畢進諸生於彝倫堂講經論學凡以明道德崇化源非徒飾圓橋之觀聽也維孔子道高德厚萬世奉爲師表其附饗廟庭諸賢皆有羽翼聖經扶持名教之功然歷朝進退不一而賢儒代不乏人或先罷而今宜復有舊缺而今宜增其從祀崇聖祠諸賢周程朱蔡外孰應升堂附饗者並先賢先儒之後孰當增置五經博士以明崇報均關大典九卿翰林國子監詹事科道會同詳考定議以聞時廷臣議改祀於鄉之林放蘧瑗鄭康成鄭衆盧植服虔范甯及罷祀之秦冉顏何戴聖何休凡十一人應復祀孟門弟子樂正

克公都子萬章公孫丑漢諸葛亮唐陸贄宋韓琦尹焞黃幹陳淳何基王柏元金履祥許謙陳皓明羅欽順蔡清

本朝陸隴其凡十八人應增祀宋張載之父迪應增祀崇聖祠伯牛仲弓冉求宰子子張有若六人應增置世襲五經博士奏上辛酉

諭

曰先儒從祀文廟關係學術人心典至重也宜復宜增必詳加考證折衷盡善庶使萬世遵守永無異議爾等所議復祀諸儒雖皆有功經學然戴聖何休未爲純儒鄭眾盧植服虔范甯謹守一家言轉相傳述視鄭康成之淳質深通似乎有間至若唐之陸贄宋之韓琦勳業昭垂史冊自是千古名臣然於孔孟心傳果有授受而能表彰羽翼乎其他諸儒是否允協以及宰子冉有增置博士之處著再公同確議務期至當不易具奏廷臣再議戴聖何休鄭眾盧植服虔陸贄韓琦無庸增祀復祀宰子冉有無庸增置博士餘如前議又請將孔子弟子縣亶牧皮宋儒魏了翁元儒趙復一併增入從祀奏上

制曰可三年秋八月癸酉

諭內閣九卿等曰古有諱名之禮所以昭誠敬致尊崇也朕臨御以來恐臣民過於拘謹屢降諭旨凡與御名聲音相同字樣不必迴避近者各省地方以音同而改易者頗多朕爲天下主而四海臣民竭誠盡敬如此況孔子德高千古道冠百王正彝倫端風化爲往聖繼絕學爲萬世開太平自天子以至於庶人皆受師資之益而直省郡邑之名有聖諱字在內者今古相沿未改朕心深爲不安爾等會議凡直省地名有同聖諱者或改讀某音或另易他字至於常用之際於此字作何迴避一併詳議具奏大學士九卿會議

圖丘字應如故府州縣名交內閣擬字進呈山川鎮市交督撫更易報部至姓氏按通考太公之後以食采謝邱得姓今擬作邱至常用宜從古體作丘爲允奏上

報可冬十二月庚辰又

諭內閣曰朕細思今文出於古文若改用正字是仍未嘗迴避也此字本有期音查毛詩及古文作期音者甚多嗣後除四書五經外凡遇此字並加卩爲邱地名亦不必改易但加卩旁讀作期音庶乎允協足副尊崇先師至聖之意是年

詔郡縣丁祭用太牢四年

頒御書生民未有額於國學闕里及天下文廟五年春二月甲子

諭內閣曰三月十八日爲

皇考聖祖仁皇帝萬壽聖節舊例於是日虔誠齋肅禁屠宰今應永遠遵行至聖先師孔子師表萬世查八月二十七日爲聖誕之期亦應虔肅致敬朕惟

君師功德恩被億載普天率土尊親之戴永永不忘而於誕日尤當加謹以展恪恭思慕之忱非以佛誕爲比擬也著內閣九卿會同確議具奏僉曰應遵

聖諭恭值至聖誕辰內外文武各官及軍民人等致齊一日不理刑名禁止屠宰永著爲令又定制省會之區凡遇丁祭督撫學政皆親詣行禮毋得先行祭丙苟簡從事七年春二月重修闕里文廟將成新塑聖賢像聖像冕十二旒服十二章啓聖及先賢冕九旒服九章悉如舊制從通政使畱保請推原先聖從周之義用元衣纁裳頒發鎮圭十一年夏六月辛未

諭內閣曰國家祀典最宜慎重至於文廟春秋祭儀尤宜備物盡誠以申敬禮聞外省州縣中有因除荒而裁減祭祀公費者朕思銀數若少難於措辦或致祭品簡略或恐派累民間二者均未可定著各省督撫查明所屬若有除荒減費之州縣卽於存公銀內撥補以足原額務令案盛豐潔以展朕肅將禋祀之誠乾隆二年秋九月
皇上諭工部曰至聖先師孔子天縱聖神師表萬世尊崇之典至我朝而極盛

皇考世宗憲皇帝尊師重道禮敬尤隆闕里文廟

特命易蓋黃瓦鴻儀炳煥超越前模朕祇紹先猷冀牆念切思國子監
爲首善觀瞻之地辟離規制宜加崇飾大成門大成殿著用黃瓦崇
聖祠著用綠瓦以昭展敬至意冬十一月兵部尙書甘汝來奏准復
祀元儒吳澄又從河南巡撫尹會一請以韓愈後法祖爲世襲五經
博士三年春三月尙書銜徐元夢請升有子於大成殿東哲位卜子
之次

詔從之是年

頒御書與天地參額於國學闕里及天下文廟九年秋七月河南學政
林枝春奏稱河南州縣有三教堂佛居中老子孔子互相左右或緇
羽奉祀或女僧住持穢褻不經宜加禁止但聖像旣成付之椎鑿銷
燬理亦未安請移奉書院義學始爲相宜其祠宇如向屬公地管領
無人者卽其地改爲書院義學且不特河南爲然北省如此者所在

多有又道流建醮輒以天尊之號謬加聖人請一體嚴禁得

旨允行二十一年今衍聖公昭煥奏請罷黜孟廟告子等從祀及改正

配享神主封號經九卿議稱告子不害之從祀雖見於宋史然考

欽定古今圖書集成及孟氏三遷志皆作浩生不害其改於何代雖不

可稽而見在所祀係浩生不害並非告子卽請定爲浩生不害似屬

允當又孟子已易上公之號其徒尙存侯伯之名誠於禮制未協應

如所奏將樂正子公孫丑萬章公都子四人改書先賢某子陳臻以

下至韓愈十五人改書先儒某氏至孔達輔有倡立孟廟之功且考

之宋史素行亦屬表表請亦書先儒某氏以昭畫一議上

報可

朝釋奠之制國學及天下文廟皆用太牢十簋豆舞六佾三獻行三

跪九叩頭禮

皇帝詣學親釋奠行兩跪六叩頭禮

幸魯親釋奠特行三跪九叩頭禮文廟大成殿中祀至聖先師孔子南
向配以復聖顏子宗聖曾子述聖子思子亞聖孟子皆旁列東西向
又次東列先賢閔子損冉子雍端木子賜仲子由卜子商有子若西
列先賢冉子耕宰子予冉子求言子偃顓孫子師朱子熹爲十二哲
東廡祀先賢蘧瑗澹臺滅明原憲南宮适商瞿漆雕開司馬耕梁鱣
冉孺伯虔冉季漆雕徒父漆雕哆公西赤任不齊公良孺公肩定鄒
單父父黑紫旂左人鄧鄭國原亢廉潔叔仲會公西與如邴巽陳亢
琴張步叔乘秦非顏噲顏何縣夏樂正克萬章周敦頤程顥邵雍凡
三十九人先儒穀梁赤伏勝后蒼董仲舒杜子春范甯韓愈范仲淹
胡瑗楊時羅從彥李侗張栻黃榦真德秀何基趙復吳澄許謙王守
仁薛瑄羅欽順陸隴其凡二十三人西廡祀先賢林放宓不齊公冶
長公皙哀高柴樊須商澤巫馬施顏辛曹卣公孫龍秦商顏高壤駟
赤石作蜀公肩首后處奚容蒧顏祖句并彌秦祖縣成公祖句茲燕

倣樂欽狄黑孔忠公西蒧顏之僕施之常申棖左邱明秦冉牧皮公
都子公孫丑張載程頤凡三十八人先儒公羊高孔安國毛萇高堂
生鄭康成諸葛亮王通司馬光歐陽修胡安國尹焞呂祖謙蔡沉陸
九淵陳淳魏了翁王柏許衡金履祥陳澧陳獻章胡居仁蔡清凡二
十三人崇聖祠中祀肇聖王左裕聖王右諡聖王次左昌聖王次右
啓聖王皆南面以先賢顏氏無繇曾氏點孔氏伯魚孟孫氏激配東
西相向從祀東列先儒周輔成程珦蔡元定凡三人西列先儒張迪
朱松凡二人闕里啓聖舊祠祀先賢先儒皆以木主啓聖王獨有塑
像迨崇聖祠旣建遷先賢先儒木主於其中而啓聖王舊像遂仍於
啓聖殿祀焉至啓聖大成兩殿後皆有寢殿祀顏夫人及元官夫人
此皆以闕里乃孔氏之家廟有異於國學及天下郡縣者也

述曰昔者夫子沒哀公誅之子貢以爲非禮蓋夫子之所以尊崇於
萬世者以道也德也功也而非以爵位名號也且以生民未有一

人而欲以一言一行之美諡概之又豈足以盡我夫子者張璠之議誠不爲無見或曰璠本以議禮得幸因大更祀典欲以掩永陵追崇興獻之失耳豈真知尊夫子者哉然而君子終不以人廢言也

闕里文獻考卷十四終

關里文獻考卷十五

祀典第三之二

月令仲春之月上丁命樂正習舞釋菜天子乃帥三公九卿親往視之又文王世子天子視學大昕鼓徵乃命有司行事興秩節祭先聖先師焉蓋古者天子無歲不有事於學而視學又無不有祭三代以上習爲故常無足異也秦漢以下此禮久絕間一行之遂爲盛典今謹就史冊之可紀者錄而序之考晉成帝咸康元年春二月甲子帝講詩經通親釋奠此爲天子親祭國學之始穆帝升平元年春三月壬申帝講孝經通親釋奠於中堂祠孔子以顏回配時以太學在水南懸遠有司議權以中堂爲太學孝武帝寧康三年亦釋奠於中堂北魏孝文帝太和十六年春二月癸丑改謚孔子曰文聖尼父遣官就廟行冊禮帝復齊中書省親拜祭於廟孝明帝正光元年春正月乙酉詔曰建國緯民立教爲本尊師崇道茲典自昔來歲仲陽節和

氣潤釋奠孔顏乃其時也有司可豫繕國學圖飾聖賢置官簡牲擇吉備禮明年春三月庚午帝幸國學祠孔子以顏淵配出帝永熙三年春二月丙子帝親釋奠禮先師詔延公卿學官於顯陽殿勅祭酒劉焯講孝經黃門李郁講禮記中書舍人盧景宣解大戴禮夏小正篇廣招儒學引令預聽周宣帝大象二年春二月丁巳帝幸露門學行釋奠禮唐高祖武德七年春二月詔曰釋奠之禮致敬先師鼓篋之義以明遜志比多缺略更宜詳備仲春釋奠朕將親覽所司具爲條式以時宣下是月丁巳帝幸國子學親釋奠太宗貞觀十四年春二月丁丑帝親釋奠於國學詔祭酒孔穎達講孝經遼太祖神冊四年帝謁孔子廟宋太祖建隆元年春正月帝幸國子監終太祖之世凡三幸學太宗端拱元年秋八月庚辰帝幸太學謁文宣王禮畢升輦將出西門顧見講座左右言博士李覺方聚徒講書帝因降輦命有司張帟幕設別座召覺講周易之泰卦賜覺帛百疋詔繪三禮器

物制度於國學講論堂木壁五年冬十一月丙寅再幸太學謁孔子
命直講孫奭講尙書賜以束帛鯉魚服淳化元年又幸太學謁孔子
眞宗咸平二年秋七月甲辰帝幸太學謁孔子命直講崔偓佺講尙
書大禹謨賜祭酒以下器幣仁宗天聖二年秋八月己卯帝幸太學
謁孔子有司言舊儀止肅揖帝特再拜退閣七十二賢贊觀東序及
禮器慶歷四年夏五月壬申再幸太學謁孔子仍再拜賜直講孫復
五品服哲宗元祐六年冬十月庚午帝幸太學親釋奠一獻再拜退
御敦化堂命侍講吳安詩執經祭酒豐稷講尙書無逸篇賜稷三品
服學官等賜帛有差徽宗崇寧三年冬十一月甲戌帝幸太學謁孔
子再拜行酌獻禮遣官分奠兗國公而下官論定之士十六人賜司
業吳綱蔣靜四品服學官推恩有差宣和四年春三月辛酉又幸太
學奠謁如崇寧儀親製孔子像贊賜祭酒韋萬隆司業權邦彥章服
學官諸生恩錫有差高宗紹興十三年秋七月國學大成殿告成奉

安聖像明年春三月己巳帝幸太學止輦大成殿門外升東階跪上香執爵三祭酒再拜遣官分奠從祀如常儀退御崇化堂命禮部侍郎秦熺執經司業高閔講易之泰卦賜閱三品服學官遷秩諸生授官免舉賜帛有差御製先聖及七十二子贊冠以序文親自書之五月揭之大成殿及兩廡孝宗淳熙四年春二月乙亥帝幸太學謁先聖退御敦化堂命禮部侍郎李燾執經祭酒林光朝講中庸學宗嘉泰三年春正月戊戌帝幸太學謁孔子退御化原堂命祭酒李寅仲講尚書周官篇學官進秩諸生賜帛有差理宗淳祐元年春正月戊申帝幸太學謁孔子退御崇化堂命祭酒曹瑩講禮記大學篇賜監學官生爵帛如嘉泰故事製道統十三贊就賜國子監宣示諸生度宗咸淳三年春正月戊申帝幸太學行舍菜禮畢命禮部尚書陳宗禮執經祭酒陳宜中講中庸賜宜中章服監學官生進秩推恩有差金熙宗皇統元年春二月戊午帝親祭孔子廟北面再拜退謂侍臣

曰朕幼年游佚不知志學歲月逾邁深以爲悔孔子雖無位其道可
尊使萬世景仰大凡爲善不可不勉章宗明昌四年秋八月丁未帝
親釋奠先期諭宣徽院曰明日親釋奠有司議肅揖朕以宣聖萬世
帝王之師可備拜裊朕將拜焉釋奠日帝北面再拜親王百僚及六
學生員陪拜詔從官分奠七十二弟子金故事帝親謁孔子不用牲
牢於是禮官言釋奠既係中祀若止用二簋二豆禮太疎簡未稱乃
更用十簋十豆儀物始備承安二年春丁帝親祀孔子以親王攝亞
終獻皇族陪祀文武羣臣助奠親製贊文更加從祀封爵哀宗天興
元年秋八月丁巳帝親奠孔子元順帝至正八年夏四月乙亥帝幸
國子學明太祖洪武元年春二月帝親祀孔子於國子學十五年作
文廟成帝將視學釋菜謂禮部尙書劉仲質曰國學新成朕將釋菜
令諸儒議禮議者曰孔子雖聖人臣也禮宜一奠再拜朕以爲孔子
明道德以教後世豈可以職位論哉昔周太祖入孔子祠將拜左右

曰孔子陪臣不宜拜周太祖曰孔子百世帝王師何敢不拜遂再拜
朕深嘉其明斷不惑於左右之言今朕有天下敬禮百神於先師之
禮宜加尊重仲質乃與儒臣定議帝服皮弁服執圭詣先師位前再
拜獻爵後又再拜制曰可夏五月乙丑帝遂幸國子監釋菜禮成易
服御彝倫堂侍臣列坐東西祭酒吳頤等以次進講講畢帝曰中正
之道無踰於儒上古聖人不以儒名而德行實儒後世儒之名立雖
有儒名或無其實孔子生於周末身儒道行儒行立儒教率天下後
世之人皆欲得其中正情乎魯國君臣無能用之者當時獨一公父
文伯之母知其賢責其子之不能從則一國君臣可愧矣卿等爲師
表正當以孔子之道爲教使諸生咸趨乎正則朝廷得人矣復命取
尙書大禹臯陶謨洪範親爲講說反覆開諭遂賜宴竟日而還丙寅
祭酒吳頤率博士龔敦上表謝各賜羅衣二襲官民生許恆等四百
三十人各賜春夏布衣十七年冬十二月復幸學二十九年帝又幸

太學行釋菜禮惠帝建文元年春三月帝釋奠於孔子成祖永樂四年春諭禮部曰朕惟孔子帝王之師帝王爲生民之主孔子立生民之道三綱五常之理治天下之大經大法皆孔子明之以教萬世天下不可一日無生民生民不可一日無孔子之道朕皇考太祖高皇帝膺君師億兆之任正中夏文明之統復衣冠禮樂之舊渡江之初首建學校祀孔子御經筵講書守帝王之心法繼聖賢之道學集其大成以臻至治朕承鴻業惟皇考之成憲是遵今春時和躬詣太學如皇考故事稱朕崇儒重道治安天下之意爾禮部擇日舉行其合行禮儀詳議以聞禮部尙書鄭賜言宋制謁孔子服韠袍再拜上曰見先師孔子禮不可簡必服皮弁行四拜禮三月辛卯朔帝親行釋菜禮畢御彝倫堂命祭酒胡儼坐講尙書堯典司業張智坐講易泰卦大臣及翰林院詞官皆賜坐講畢宣諭勉勵師生命光祿寺賜百官茶次日祭酒胡儼等上表箋稱謝賜祭酒以下學官監生宴仍賜

儼智紵絲羅衣各二襲學官王峻等三十五人紵絲衣各一襲監生
朱璿等三千七十四人鈔各五錠帝親爲製文立碑太學英宗正統
九年太學新成春三月辛亥朔帝幸學釋菜御彝倫堂命祭酒李時
勉坐講大學克明峻德章尙書益稷謨帝庸作歌一節司業趙琬坐
講周易文言講畢宣諭宴賚如故事景帝景泰二年春二月辛未帝
幸學謁廟先期命行人官召取衍聖公孔彥緒並三氏子孫赴京觀
禮遂定爲今後凡幸學必先期遣官召取焉帝祭畢御彝倫堂命祭
酒蕭鎡講書經皐陶謨天聰明一節司業趙琬講周易泰卦象辭禮
成賜衍聖公等宴講官並學官諸生增賜鈔帛冠帶有差憲宗成化
元年春三月丁巳帝幸太學始設牲用樂命衍聖公孔宏緒分獻沂
國公禮成宴賚如故事孝宗弘治元年春三月癸酉駕幸太學釋奠
先師用吏部尙書王恕言詔先師位加幣用太牢改分獻爲分奠餘
如永樂故事命衍聖公孔宏泰分奠竟國公祭畢御彝倫堂命祭酒

費闇講說命惟天聰明一節司業劉震講乾卦大人與天地合德一節武宗正德元年春三月甲申帝視學謁孔子命衍聖公孔聞韶分奠沂國公聞韶以禪服辭命吏部右侍郎梁儲代世宗嘉靖元年春三月甲寅帝幸太學釋奠先師至櫺星門外卽降輦步入禮畢仍步出櫺星門外升輦御彝倫堂命祭酒趙永講尙書帝曰予允若茲一節司業吳惠講易乾卦時乘六龍一節九年釐正祀典明年冬禮臣奏請幸學詔於十二年春三月舉行至是年三月丙辰復幸太學釋奠先師命衍聖公孔聞韶分奠亞聖孟子祭畢帝御彝倫堂命祭酒林文俊講尙書益稷謨司業馬汝驥講周易頤卦穆宗隆慶元年秋八月癸未帝幸太學釋奠先師命衍聖公孔尙賢分奠加賜尙賢羊酒鈔錠又賜觀禮族長孔談冠帶神宗萬歷四年秋八月壬戌帝幸太學釋奠先師命尙賢分奠尙賢以祖母喪辭更命協理京營尙書劉應節代祭畢帝御彝倫堂命祭酒孫應龍講尙書旱陶謨司業沈

淵講周易離卦熹宗天啓四年春三月甲寅帝幸太學釋奠先師觀禮族人
有職者予冠帶生員送監讀書遂爲例時中書孔聞詩行人孔聞諛亦奏請觀禮以特恩未俸滿准考選莊烈帝崇禎二年春正月丙子帝幸太學釋奠先師祭畢御彝倫堂命祭酒孔貞運講尙書大禹謨司業倪嘉善講周易泰卦五年春三月癸卯帝又幸太學釋奠十四年重建太學成秋八月辛酉復釋奠先師命衍聖公孔衍植分奠宗聖曾子祭畢帝御彝倫堂命祭酒講阜陶謨司業講周易咸卦講畢帝入彝倫堂後敬一亭觀世宗所立程子四箴諸碑又令將廟內各碑及石鼓俱摹搨進覽時有旨幸學典禮定爲三年一舉行國朝順治九年秋九月辛卯

世祖章皇帝幸學行釋奠禮先期

遣行人張九徵召取衍聖公孔興燮及五氏博士並族人赴京觀禮釋奠日行三獻兩跪六叩頭禮

命大臣分獻四配十哲兩廡畢

御彝倫堂王等入堂內陪祀各官在堂下東西侍立衍聖公率博士族人祭酒司業率學官諸生各序立行三跪九叩頭禮

賜坐王公文武各官皆坐祭酒姑爾馬叶李爽棠就案坐講易經司業馮杰就案坐講書經講畢禮部堂官奏傳

制祭酒司業率學官諸生皆跪聽宣畢祭酒以下行三跪九叩頭禮

賜王以下各官茶

駕還宮次日

御太和殿衍聖公及祭酒等上表謝

賜衍聖公內院翰林官祭酒司業學官五經博士五氏子孫及禮部太常寺光祿寺鴻臚寺執事各官宴於禮部又

賜衍聖公蟒緞朝服一領貂帽一頂祭酒司業學官五經博士五氏子孫及監生等各賞給品服銀兩有差其陪祀生員孔尙燃等十五人

俱准作恩貢送監讀書十七年復以修葺文廟成

臨雍親祭如九年儀康熙八年夏四月丁丑

聖祖仁皇帝幸學行釋奠禮

御彝倫堂

命祭酒賈祿宋德宜講易經司業

講書經先期

遣行人司司正陳調元召取衍聖公孔毓圻率各博士族人等赴京陪
祀時內國史院中書舍人顏光敏四氏學學錄孔貞燦候補運同孔
貞來候選縣丞孔尙義監生孔衍璐均得請隨班觀禮禮成錄顏光
敏以應陞缺用孔貞燦加一級孔貞來孔尙義以應得缺先用孔衍
璐俟考定職銜遇缺卽用陪祀恩貢俱如順治九年故事雍正元年
冬十一月丁酉

世宗憲皇帝諭禮部曰孔子道冠古今爲萬世師表薄海內外無不俎
豆尊崇國學乃四方表率其制尤重

聖祖仁皇帝臨雍釋奠典禮優隆朕續承大統景仰先型夔牖如見念國學爲造士之地聖教所被莫先於此恐歷歲旣久有應加修葺之處爾部會同工部詳加閱視凡文廟殿宇廊廡及講學堂舍務須整理周備俾廟貌聿新以申景慕朕將親詣焉明年春二月辛酉又諭帝王臨雍大典所以尊師重道爲教化之本朕覽史冊所載多稱幸學而近日奏章儀注相沿未改此臣下尊君之詞朕心有所未安今釋菜伊邇朕將親詣行禮以後一應奏章記注稱幸非宜應改爲詣字時禮部照例題請差官行取衍聖公及博士族人赴京

特旨衍聖公身有弱疾且在制中令於子弟中遴選一人代替行禮衍聖公孔傳鐸奏以次子候襲五經博士繼溥代禮部議令列左翼一品班末得

旨仍列衍聖公原班三月乙亥朔

詣學行釋奠禮祭畢

御彝倫堂

命祭酒塞楞額王傳講大學聖經第五節司業博禮彭維新講大禹謨人心惟危一節禮成宴賚優絃如故事

召見衍聖公及各博士并廕生孔傳鉦候襲博士孔繼溥知縣孔興誥孔傳中顏肇維奉

旨孔興誥以知府卽用孔傳中以知州卽用

賜衍聖公孔傳鐸

御書喜雨詩一章及貂皮珍墨下逮博士族人等宴賞各有差陪祀恩貢如故事是年夏六月戊戌曲阜孔廟災

上具素服親詣國子監文廟行祭告禮陪祀諸王大臣官員皆常服從事

駕由東華門出不設鹵簿不鳴鐘不陪祀王大臣官員亦不迎送四年秋八月丁卯

上親詣文廟釋奠凡進爵帛皆跪獻禮畢

諭禮部侍郎三泰太常寺卿孫柱曰儀注內開獻帛進酒皆不跪今跪獻非誤也若立獻於先師之前朕心有所不安將此諭眾知之爾衙門可記檔案以後照此遵行七年以闕里慶雲見冬十二月辛酉

上親詣文廟祭告乾隆三年春三月甲寅

今皇帝詣學行釋奠禮先期遣官召取衍聖公孔廣森率十三氏博士族人等赴京陪祀祭畢

御彝倫堂

命祭酒國璉孫嘉淦講中庸首節司業塞爾登李文銳講尙書首節次日衍聖公率諸博士族人入朝謝皆

賜宴於內廷又

召見衍聖公各博士及至聖嫡裔廕生孔傳鉦孔繼洞孔廣祚候選州同四品執事官孔繼浩監生臣繼汾於乾清宮西煖閣

賜衍聖公

御製樂善堂文集一部貂皮四張墨二匣其十三氏博士及臣等俱

賜樂善堂文集貂皮墨各有差又錄孔繼洞以員外郎卽用孔繼浩以
州同卽用仍用四品頂帶陪祀族人孔繼袞等三十一人俱准作恩
貢觀禮副榜顏懋璞監生孔傳澄等八人准以應考之職銜掣籤註
冊廩生孔繼炯等四人准作貢生增生仲宏文附生孔毓昉等八人
俱准作監生其餘隨班行禮之見任候補官翰林院檢討仲永檀等
三十六人各紀錄一次聽講之族人九十二名各賞銀一兩仍照例
各賞衣一襲宴於禮部五年秋八月丁巳

上釋奠於太學九年春二月丁巳

上釋奠於太學十八年秋七月壬申

上諭太常曰春秋釋奠例應遣官朕自往歲恭詣孔廟行禮後已閱五
年仰止宮牆心殷景慕此次親詣行禮崇聖祠遣史貽直行禮八月

丁亥

上釋奠於太學故事郎中以上方陪祭時臣繼汾以戶部主事得請亦與陪祭遂爲例二十一年春二月丁未

上釋奠於太學

述曰古者幸學皆命有司行事天子親往視之而已自東晉以下始有親行奠祭之禮茲考專以祀典爲重故於漢光武之幸太學明帝之臨辟雍槩從刪節焉

闕里文獻考卷十五終

闕里文獻考卷十六

祀典第三之三

闕里爲先聖篤生之地車服禮器賢士大夫實深仰止而天子之尊亦每躬臨展謁焉考漢高帝十二年冬自淮南還過魯躬謁孔子祠以太牢明帝永平十五年春二月東巡狩三月幸孔子宅祠孔子及七十二弟子帝升廟西向立羣臣中庭北面皆再拜帝進爵而後坐親御講堂命皇太子諸王說經章帝元和二年春二月東巡狩三月己丑進幸魯庚寅祠孔子及七十二弟子作六代之樂命儒生講論語帝升廟進爵如永平儀大會孔氏男子年二十以上者六十三人令以儒者巾服見賜褒成侯損及諸孔氏男女錢帛有差帝還畱祭器於廟又以十九代孫僖奏對稱旨拜郎中令從還京師語在僖家傳中安帝延光三年春二月帝東巡狩三月戊戌祠孔子及七十二弟子於闕里自魯相令丞尉及孔氏親屬婦女諸生悉會賜饗亭侯

以下帛各有差元魏孝文帝太和十九年夏四月庚申帝行幸魯城
親祠孔子廟辛酉詔拜孔氏四人顏氏二人官唐高宗乾封元年春
正月封禪泰山辛卯幸曲阜贈孔子太師元宗開元十三年冬十一
月封禪泰山丙申幸孔子宅親釋奠又遣禮部尙書蘇頌以太牢祭
孔子墓詔曰孔宣父誕聖自天垂範百代作王者之師表開生民之
耳目朕增封岱岳迴鑾泗濱思闕里之風想雩壇之咏邈矣遺烈慨
然永懷式遵祀典用申誠敬宜令禮部尙書蘇頌以太牢致祭仍令
州縣以時祠享復近墓五戶長供掃除周太祖廣順二年夏五月帝
克慕容彥超於兗州六月朔乙酉遂幸曲阜親祠孔子再拜從臣言
天子不當拜異代陪臣帝曰夫子聖人也百王取則安得不拜至墓
復拜畱所奠金花銀鑪十數事於廟勅兗州葺墓所祠宇禁樵採宋
眞宗大中祥符元年冬十月帝封禪泰山畢詔曰朕以紀號岱宗觀
風廣魯載懷先聖實主斯文矧尼邱毓粹之區光靈可挹而曲阜奉

祀之地廟貌攸存將申款謁之儀用表欽崇之志宜取十一月朔日
幸曲阜縣備禮躬謁謹將朕意仍付所司十一月朔戊午帝幸曲阜
謁孔子廟內外設黃旄仗文宣公宗屬並陪位帝褰袍再拜行酌獻
禮命翰林學士右諫議大夫晁迥奠孔子父母刑部尙書溫仲舒寇
準分奠十哲翰林學士左司諫楊億尙書戶部侍郎趙昌言給事中
張秉右正言周起王和尚書司封郎中錢惟演分奠七十二弟子及
從饗先儒初有司定儀肅揖帝特展拜幸叔梁父堂又幸孔林以樹
礙道有司將翦伐帝不許降輦乘馬至墓設奠再拜憩息墓左者久
之越三日辛酉追謚孔子爲口諱廟聖文宣王追封聖考妣及夫人仍
令有司以時修葺祠宇給近便十戶奉塋廟親製文宣王贊命廷臣
分撰顏子以下諸贊刻石廟中又命以御香一盒并銀鑪及親奠祭
器皆畱於廟授四十六代孫聖佑奉禮郎聖佑及近屬賜出身者六
人仍賜孔氏家錢三十萬帛三百疋又賜孔氏廟經史勅曰國家尊

崇師道啓迪化源眷惟鄒魯之邦是曰詩書之國尼山在望靈宇增嚴朕以登岱告成迴鑾款謁期清風之益振舉縟禮以有加式資誨誘之方更盡闡揚之旨宜以所賜太宗皇帝御製御書與九經書并正義釋文及器用等並置於廟中書樓上收掌委本州長吏職官與本縣令佐等同共檢校在廟如有講說釋奠並須以時出納勿令損汙又給廟守兵四十人

國朝康熙二十三年秋九月

聖祖仁皇帝東巡岱宗遂幸江南冬十一月戊寅還

幸闕里己卯

親釋奠孔子祭文曰仰惟先師德侔元化聖集大成開萬世之文明樹百王之儀範永言光烈罔不欽崇朕丕御鴻圖緬懷至道憲章往哲矩矱前模夕惕朝乾覃精思於六籍居今稽古期雅化於萬方繫惟典訓之功實睹乂安之效茲者巡省方國至於岱宗瞻望魯邦爰來

闕里空堂至止恍聞絲竹之聲舊寢徘徊喜動宮牆之色車服禮器
宛然三代遺風几杖冊書夔矣千秋盛蹟恍明靈之儼在文治遐昌
肅禮祀以惟虔精忱庶格時禮官議儀注兩跪六拜如釋奠大學儀
不用樂奉

旨尊禮先師應行三跪九叩頭禮用樂

命內閣學士麻爾圖翰林院學士常書都察院副都御史孫果翰林院
掌院學士孫在豐內閣侍讀學士徐廷璽翰林院侍讀學士朱瑪泰
太僕寺少卿楊舒欽天監監正安泰分獻四配十哲及兩廡從祀先
賢先儒巡撫張鵬率司道府等衍聖公孔毓圻率各博士及族人等
皆陪位同日

遣國子監祭酒阿瑚祭告啓聖祠祝文曰惟公系本神靈生稱瓊璋勇
力聞於魯國皆道德所發皇政事紀於鄆邦悉文章所宜著雋生聖
子代爲帝師寰宇崇歲祀之儀不先父食古今奉斯文之統共指家

傳茲值東巡特臨曲邑溯三千年之教澤孰非厚德燕詒垂七十世之孫謀如見明神陟降用修彝祭之典代以扈從之臣泗水環流知發源之有自防山聳峙占積慶之無疆牲醴式陳尙其歆格祭畢御詩禮堂講筵隨從諸臣巡撫司道衍聖公及各博士族人皆入堂聽講班既定傳

特旨兗州府知府張鵬翮爲官清正亦准聽講監生孔尙任進講聖經首節舉人孔尙鉉進講易繫辭首節講畢

勅大學士王熙宣

諭衍聖公孔毓圻等曰至聖之道與日月並明與天地同運萬世帝王咸所師法下逮公卿士庶罔不率由爾等遠承聖澤世守家傳務期型仁講義履中蹈和存忠恕以立心敦孝弟以修行斯須弗去以奉先訓以稱朕懷爾等其祇遵毋替宣畢

上諭大學士曰孔尙任等陳書講說克副朕懷著不拘定例用又

諭曰朕初至闕里祀典旣成意欲徧覽先聖遺蹟著衍聖公孔毓圻山東巡撫張鵬口北道孔興洪講書官孔尙任孔尙鉉引駕

上復至大成殿召孔氏子孫入

諭曰至聖之德與天地日月同其高明廣大無可指稱朕向來研求經義體思至道欲加贊頌莫能名言特書萬世師表四字懸額殿中非云闡揚聖教亦以垂示將來歷代帝王致祀闕里或畱金銀器皿朕今親詣行禮務極尊崇異於前代所有曲柄黃蓋畱之廟中以示朕尊聖之意

覽先聖手植檜

御製古檜賦又賦詩一章

覽漢元嘉始置百石卒史碑尙任奏百石卒史卽今守廟百戶官也毓圻因奏典籍司樂管勾等官皆奉朝選惟百戶止由臣劄委乞一體題授

詔許之登詩禮堂以

御製過闕里詩

賜毓圻等旋

駕幸孔林詣先聖墓行一跪三叩頭禮酌酒畢

覽林中古蹟徘徊久之問林周幾許毓圻具以對尋以開擴請得

旨報可是日

賜衍聖公五經博士及族人等書籍貂蟒銀幣各有差又敘錄陪祀觀
禮人員生員孔衍溥等十五人准作恩貢送監讀書見任官口北道
孔興洪以應陞之缺先用候補候選官廕生孔興滋等二十三人舉
人孔興璉等六人並以應得之缺先用貢生顏光岳等十一人俟考
定職銜先用其世襲官員各加一級二十五年

御製幸魯碑文及孔子顏曾思孟四子贊勒石於闕里乾隆十二年夏
六月朔庚申奉

上諭朕幼誦簡編心儀先聖一言一動無不奉聖訓爲法程御極以來
覺世牖民式型至道願學之切如見靈牆辟雍鐘鼓躬親殷薦而未
登闕里之堂觀車服禮器心甚歉焉仰惟

皇祖聖祖仁皇帝巡幸東魯親奠孔林盛典傳於奕禩

皇考世宗憲皇帝崇聖加封重新廟貌嘗遣朕弟和親王恭代展祀未
以命朕意者其或有待歟朕寅紹丕基撫茲熙洽思以來年孟春月
東巡狩因溯洙泗陟杏壇瞻仰宮牆曰景行之夙志復奉

聖母皇太后懿旨泰山靈巖坤德資生近在魯邦宜崇報享朕不敢違
爰遵

慈訓親奉

鑒輿秩於岱宗用答鴻貺旋蹕青齊觀風布澤以昭崇聖法

祖教孝省方鉅典所有應行典禮大學士會同該部稽考舊章詳悉具
議以聞其應預備之各衙門查察事宜先期請旨至行在一切所需

悉出公帑無得指稱供頓儲侍絲毫貽累閭閻羽林衛士內府人役等各該大臣嚴行稽查約束並令扈蹕文武臣僚嚴飭廉從母或侵踐田疇致妨宿麥如有騷擾地方指名需索者立即參奏從重治罪通行曉諭知之明年春二月戊午

皇上起鑾戊寅

駕至曲阜是日先

詣廟拈香山東巡撫阿里袞濟東泰武道明德衍聖公孔昭煥舉人臣孔繼汾恭導

聖駕至奎文閣前降輦步入大成門

皇上升階盥手入殿中上香行三跪九叩頭禮畢

周覽廟中古跡

還行宮翼日己卯

皇上親釋奠祭文曰仰惟先師道備中和德兼聖智贊修刪定敷教化

於六經祖述憲章紹心傳於羣聖樹百王之軌範開萬世之太平爲
今古所尊崇與天地無終極昔

皇祖駕臨曲阜既肅將於廟貌復祇謁於塋林宮碑

聖製之文

御蓋

天章之錫輝煌闕里照耀杏壇展慕道之隆情迴遙往代備崇儒之極
則度越前規朕不續鴻圖敬承

祖烈誦遺言於典籍夙懷向往之心驗至道於敷施式冀治平之效茲
者巡行東國泣止聖居欣瞻萬仞之宮牆喜睹千秋之禮器陟堂階
而景仰恍親道範於琴書依殿壁以徘徊似聽元音於金石謹齊心
而上格期靈爽之來歆鑒此微忱翊予雅化三獻九拜如康熙二十
三年儀四配十二哲及兩廡從祀先賢先儒

命左都御史劉統勳吏部左侍郎德齡刑部左侍郎錢陳羣工部左侍

郎索柱內閣學士德爾格詹事府詹事裘曰修少詹事世貴鴻臚寺卿吳應枚等各分獻崇聖祠

遣誠親王允祕行禮祝文曰惟王系本商家代爲公姓生聖人之後華胄迢遙行明德之傳令名昭著自孔父別族爲得姓受氏之宗逮防叔來歸稱適魯始遷之祖禔躬迪德數傳而緒業彌昌保世元宗奕世而詒謀愈遠惟善仁之積累乃神聖之篤生早開文教之先宜食燕詒之報我

皇考特加恩命並錫榮封合五代以同尊曠千秋而獨盛備極崇儒之禮允隆報德之文茲以時巡緬懷前蹟仰褒綸之赫奕式昭佑啓之功瞻爵號之輝煌倍切景行之慕虔申祀事特遣專官惟冀神靈尙其歆格崇聖祠先賢先儒

命侍讀吳爾泰贊善武極理給事中宗室同鑑馬宏琦各分獻祭畢御詩禮堂講筵臣孔繼汾進講中庸凡爲天下國家有九經一節優貢

生孔繼洙進講周易臨卦象辭隨從諸臣巡撫司道衍聖公各博士及十三氏子孫皆入詩禮堂聽講講畢

勅大學士傅恆宣

諭衍聖公孔昭煥等曰至聖之道參天地贊化育立人極爲萬世師表凡茲後裔派衍支繁尤當永念先型以期無忝昔我

皇祖東巡時邁闕里特頒

聖諭炳若日星朕仰紹

前徽虔修展謁之禮念爾等令緒相承淵源勿替載申誥諭用示訓行其務學道敦倫修身慎行克稟先師之彝訓祇遵

聖祖之誨言弗愧爲聖者子孫朕實嘉予之其欽承毋怠宜畢遂幸孔林酌酒行一跪三叩頭禮旋

詣少昊陵致祭周公廟拈香

上還行宮

賜十三氏子孫宴

御書門榜聯額懸大成殿詩禮堂及各門又

諭內閣曰康熙二十三年恭遇

皇祖幸魯尊崇至聖曾將曲柄黃蓋畱供大成殿今朕親詣闕里釋奠
先師敬紹

前徽具遵成例其以曲柄黃繖畱於廟中永光秩祀

詔東省本年錢糧見已普免曲阜泰安歷城爲鑾輿駐蹕之所將次年
地丁錢糧全行蠲免廣山東通省入學額數大學三名中學二名小
學一名又

諭學臣拔十三氏子孫有文學可觀讀書立品者貢入成均以示鼓勵
授臣孔繼汾內閣中書舍人

賜孔昭煥貂裘蟒服表裏經史

錫賚聖賢後裔如康熙二十三年故事凡十三氏子孫有職者皆加一

級進士舉人各增賞銀十兩貢監生員各銀五兩又

特諭昭煥曰先師修道立教天下萬世之人服習聖訓咸有以自善其身况爲其子孫者乎卿以宗裔奉祀紹封列爵旣優崇矣當思淵源何自夙夜敬勉親師向學以植始基慎行謹言以培德器循循詩禮之教異日卓然有所成就允孚令望表率族黨俾當世知聖人之後能守家傳於勿替匪徒章服之榮已也豈不休哉其祇遵罔斁先是太常寺卿李世倬奏曲阜有顏子專祠應否遣官致祭至是

上諭內閣曰朕東巡躬詣闕里致祭先師顏曾思孟四賢作配殿庭雖從與享但聞其故里各有專廟應分遣大臣恭奉香帛前往祭獻以展誠敬朕向在書齋曾製四賢贊景仰之忱積有日矣其勒石廟中致朕崇重先賢之意乃

遣禮部左侍郎鄧鍾岳祭顏子曰惟復聖顏子質秉深潛學精純粹處屢空之境樂著不移受終日之傳詣稱足發三月之操存無間克復

歸仁四代之禮樂兼該行藏與共踐履祇爭一閒入聖域以非遙行能首冠諸科紹心傳於不墜追崇允合昭報攸宜朕稽古東巡至於東魯慕前型而不遠用企清修瞻遺廟以猶存式懷令範虔修祀事敬遣專官惟冀神靈尙其歆格

遣裴曰修祭曾子曰惟宗聖曾子秀毓武城業宗泗水三省勤於夙夜允稱篤實之功一貫悟於須臾彌徵真積之久獨受孝經之訓用迪臨深履薄之修永綿大學之規式啓明德新民之要衍薪傳於勿替以魯得之開絕學於無窮其功大矣追崇允合昭報攸宜朕稽古東巡至於東魯念先型之未遠心切溯洄瞻故里之非遙情深仰止虔修祀事敬遣專官惟冀神靈尙其歆格

遣光祿寺卿沈起元祭子思子曰惟述聖子思子早迪躬修懋承家訓肩聖人之遺緒無慙繩武之文孫紹賢父之芳踪不忝克家之曾子嬰城固守式昭貞靖之操卻餽森嚴想見剛方之概闔尼山之絕學

衍道統於無窮啓鄒嶧之先聲荷新傳於勿替追崇允合昭報攸宜
朕稽古東巡至於東魯仰瞻故里緬道範之猶存式念前修幸儀型
之未遠乃修秩祀用遣專官惟冀神靈尙其歆格

遣吳應枚祭孟子曰惟亞聖孟子靈鍾鄒嶧道贊尼山母教三遷德業
夙成於早歲師傳一綫淵源私淑諸其人聞性善養氣之精擴聖人
之所未發述唐虞三代之治爲奕世之所共由衛正學而闢異端功
豈在於禹下尊王綱而賤霸術教實秉於孔門洵宜昭報於千秋允
合尊崇於億載朕省方時邁至於魯邦欽廟貌以非遙恍瞻氣象遣
專官而將事式薦馨香惟冀神靈尙其歆格二十年平定伊犁俘達
瓦齊大告武成夏六月己酉奉

上諭曰平定準噶爾捷聞以數十年逋寇迅就廓清荒服教寧中外蒙
福乃我國家無疆之休緬惟

皇祖聖祖仁皇帝削平三孽於康熙二十三年諏吉東巡

親祭闕里武功文德彪炳簡冊朕仰承

先烈集此大勳保泰持盈彌深兢業親告成功於

太廟

郊

社嶽瀆諸祀次第遣官敬謹舉行以昭懋典先師孔子闕里理應恪循

成憲躬詣行禮用申誠敬且自瞻謁林泉已逾六載仰止之恩時切於

懷擬於明歲春月敬奉

皇太后安輿自京起鑾恭詣曲阜翠華所經亦以體察吏治清閭閻

行慶施惠以稱朕法

祖尊師之至意所有應行預備事宜該部詳議以聞二十一年春二月

辛亥

皇上自京起鑾三月己巳朔

駕至曲阜先

詣聖廟拈香翼日庚午

皇上親釋奠祭文曰朕惟治統道統理本同源作君作師義歸一致先師功高堯舜德炳乾坤集羣聖之大成金聲玉振開六經之正學觀海登山百代奉爲楷模萬年光於俎豆緬

皇祖親臨岱嶽特隆北面之文洎朕躬祇謁尼山卽在東巡之歲式觀車服時已閱乎七年景仰宮牆心彌殷於再至惟尊師之典與法

祖俱長亦望道之誠共省方益切幸文治興崇之會正遠人率服之年稽典禮於王猷聿修時邁本治平於聖訓上印心傳載薦明禋敬申昭報聆金絲而嚮往警欬非遙溯詩禮以趨踰儀型若接鑒茲誠意尙克來歆翊我鴻圖庶幾受福

命禮部尙書楊錫紱兵部尙書傅森工部尙書汪山敦理藩院尙書那延泰吏部左侍郎歸宣光戶部右侍郎五福刑部左侍郎勒爾森工部右侍郎夢麟內閣學士富德錢維城分獻十二哲及從祀先賢先

儒同日

遣大學士陳世倌祭告崇聖祠曰惟王迪德承家累仁毓聖自子姓別族之始式訓傳恭迄鄉鄉從政以還在師致果六百載神明後裔美克著乎象賢萬億年文教常開功自歸於燕翼褒封載錫仰綸綍之垂光歲祀維虔薦苾芬而致敬事隆恆典禮紹前規茲以諏吉東巡告成闕里櫟楹在望彌嚮往以追崇俎豆斯陳載緬懷於佑啓用申彝祭特遣專官惟冀神靈尙其歆享崇聖祠先賢先儒

命鴻臚寺卿儲麟趾通政使司參議那瀚翰林院侍讀索爾遜中允德昌各分獻祭畢

駕詣孔林親酌酒如十三年儀辛未

回鑾幸泉林道經啓聖墓

命大學士陳世倌詣墓前奠酒又

遣歸宣光祭顏子曰惟復聖顏子泗水鍾英杏壇希聖四科首選德行

冠夫諸賢三月無違克復徵於一日證行藏之合常屢空而晏如集
禮樂之成堪王佐而不愧好學之懿修弗替廟庭之配典常崇茲以
時巡載臨舊里侑尊罍於廣殿已致虔恭申奠醑於專官更陳秩祭
靈其來格享此清芬

遣勒爾森祭曾子曰惟宗聖曾子秀毓武城學宗泗水懋姱修於篤實
三省勤夙夜之功崇真積於躬行一貫悟精微之旨端治國齊家之
本大人之學昭垂示至德要道之原教孝之經永著衍孔門之聖脈
以魯得之啓孟氏之師傳其功大矣尊崇允協報享攸宜朕以禮時
巡遄臨魯甸情深仰止瞻故里之非遙心慕典型念德輝之如在虔
申禋祀敬遣專官惟冀神靈庶其歆格

遣富德祭述聖子思子曰惟述聖子思子派衍尼山教原泗水繩其祖
武性天本自家傳慎厥身修詩禮紹夫庭訓道尊不友抗顏魯費之
庭義重爲臣仗節衛齊之境紹曾傳於忠恕三十三章啓孟淑於見

聞百有餘歲追崇自昔昭報於今朕載謁孔林重臨魯國千秋俎豆
欽述作於一家數仞宮墻念後先之同揆爰修明祀特遣專官靈爽
式憑尙其歆格

遣錢維城祭亞聖孟子曰惟亞聖孟子靈鍾鄒嶧學本尼山溯私淑之
淵源道實承夫三聖紹見知之統緒辭大備於七篇幼學壯行旣躬
履夫仁義知言養氣亦明析其精微衛正學而闢異端惟道性善尊
王政而賤霸術聿正人心教悉稟於孔門功不在於禹下朕時巡東
土蒞止魯邦欽廟宇之非遙如親道範勅專官而將事肅薦馨香惟
冀神靈尙其來格二十二年春正月

皇上南巡江浙二月甲申奉

上諭朕擬於回鑾渡淮後由順河集前往徐州取道至山東之曲阜展
謁孔林用申仰止之忱

皇太后鑾輿仍由順河集先至泰安之靈巖山駐蹕所有尖營道路務

從簡約但取足供行走頓宿而已不必過求齊備夏四月己巳

上過鄒縣

親幸孟廟拈香行一跪三叩頭禮是日

駕至曲阜

詣聖廟拈香行三跪九叩頭禮翼日庚午

幸孔林酌酒乃

回鑾

述曰歷稽幸魯之事惟漢四見唐再見元魏後周及宋祇一見下逮元明更絕無可紀者又其間皆以便道展謁或仍遣官代祀其儀節亦無足稱焉若夫

特下德音專修謁奠禮明樂備至再至三則亘古以來惟我

皇上一人而已書之於冊使知由孔子而來二千三百餘年而獲睹尊

崇之極軌者則自我

皇上始

闕里文獻考卷十六終